

Lombo: Bible for Malako  
Formatted for Translators

©2022 Wycliffe Associates

Released under a Creative Commons Attribution-ShareAlike 4.0 International License.

Bible Text: The English Unlocked Literal Bible (ULB)

©2017 Wycliffe Associates

Available at <https://bibleineverylanguage.org/translations>

The English Unlocked Literal Bible is based on the unfoldingWord® Literal Text, CC BY-SA 4.0. The original work of the unfoldingWord® Literal Text is available at <https://unfoldingword.bible/ult/>.

The ULB is licensed under the Creative Commons Attribution-ShareAlike 4.0 International License.

Notes: English ULB Translation Notes

©2017 Wycliffe Associates

Available at <https://bibleineverylanguage.org/translations>

The English ULB Translation Notes is based on the unfoldingWord translationNotes, under CC BY-SA 4.0. The original unfoldingWord work is available at <https://unfoldingword.bible/utn>.

The ULB Notes is licensed under the Creative Commons Attribution-ShareAlike 4.0 International License.

To view a copy of the CC BY-SA 4.0 license visit <http://creativecommons.org/licenses/by-sa/4.0/>

Below is a human-readable summary of (and not a substitute for) the license.

You are free to:

Share — copy and redistribute the material in any medium or format. Adapt — remix, transform, and build upon the material for any purpose, even commercially.

The licensor cannot revoke these freedoms as long as you follow the license terms.

Under the following conditions:

Attribution — You must attribute the work as follows: "Original work available at <https://BibleInEveryLanguage.org>."

Attribution statements in derivative works should not in any way suggest that we endorse you or your use of this work.

ShareAlike — If you remix, transform, or build upon the material, you must distribute your contributions under the same license as the original. No additional restrictions — You may not apply legal terms or technological measures that legally restrict others from doing anything the license permits.

Notices:

You do not have to comply with the license for elements of the material in the public domain or where your use is permitted by an applicable exception or limitation.

No warranties are given. The license may not give you all of the permissions necessary for your intended use. For example, other rights such as publicity, privacy, or moral rights may limit how you use the material.



# Malako

## 1

<sup>1</sup>Tene liako li mboli itanu iya Yesu Kilisito, Wana aya Mungu. <sup>2</sup>Kani esonaka botondoli Yisaya: Tene, lototoma botondoli wange felo yao, ye atokomanya ndole ao. <sup>3</sup>Limiki liya ono atomama katikati ii liombebe mbo: Komiaka bootelo boya Ngene, la emalisaka ndole inde. <sup>4</sup>Yoani Bolufwi aofowa aiteni ii liombebe atonangola lolufiomo lo lokikowo ta botema la lomesilo bebe. <sup>5</sup>Baito ba wenda likulu bo Yuda baofowa okoma ambe ye la baito batotinaba Yelusaleme aleko. Balufiomoko linde ta libande li Yelusaleme, oko ekayambolaka bo bebe bibo. <sup>6</sup>Yoani akabata tulu inde ee fuu ii kamela la lomboso lo nama la bolemba ta loteta linde; akala bieke bi nyele la liabu li lokonda. <sup>7</sup>Akanangola mbo: Ono aeti ei la bofoka atoya mbisa yange. Ei loiyengani losuluwo sekala loka lofongula boliki bo bilato binde. <sup>8</sup>Ei lolufienu ta baye, ndjo ye atolufienu ta Bolimo Botanu. <sup>9</sup>Ta basiyo bamo Yesu afowaka ta Nasaleta ta wenda bo Galilai la akalufiomo la Yoani ta Yaladene. <sup>10</sup>Ekafowa ye ta baye, la mangu akaena Likolo olikolamana la Bolimo akasuluwela ye kee ekuku. <sup>11</sup>Limiki likafowa la likolo mbo: Ono Wana ange a losamo, lofo'omala lao likama. <sup>12</sup>La mangu Bolimo akakesa ye ta liombebe. <sup>13</sup>Ye ambaka elo basiyo tuku inati la apimomoko la Satana. Ambaka eseke lomoi la nama ii bekale la bakitomo bakuwela ye. <sup>14</sup>La ongoma mbisa iya Yoani okandomo, Yesu akomaka ta Galilai loka lo'onangola Mboli Itanu iya Mungu. <sup>15</sup>Akabeka mbo: Lolakomo lo'osila oengana la bokota boya Mungu bo'omba tina; kikoliakai betema la imilakai Mboli Itanu. <sup>16</sup>Embaka ye oeta tina la bomongo bo libande lifi li Galilai, akaena Simona la Andalea, nduku aya Simona, bambaka batokusa baeya ba bieyengo katikati ii baye, la ongoma bambaka baluki ba suwe. <sup>17</sup>Yesu akabeka libo mbo: Tutekeni la lotosele'nu baluki ba baito. <sup>18</sup>La mangu bakatika bieyengo la bakatuta ye. <sup>19</sup>Ekashushama ye felo eniyo, akaena Yakobo, wana aya Jebedai, la Yoani nduku inde; bambaka katikati ii wato atokomanya bieyengo bibo. <sup>20</sup>La mangu akata bo; bakatika ise ibo Jebedai katikati ii wato eseke lomoi la bakuwi, la bakatuta ye. <sup>21</sup>Bakaka ta Kafelanaume, la, lisio li Yenga, Yesu akota ta mbele Mungu, la akaekisa. <sup>22</sup>Akaoshana la bekeeli bibe, ekisakae ta ani embakae bokota la atimba ke baandiki ngoto. <sup>23</sup>Akaosha kati embele e-Mungu buto amoi ono ambe la belimo bëbe, ta malaemoi akamama: <sup>24</sup>Ee Yesu a Nazareta? tombe langi lao, oya ase oya seselisa-esu? oluwi lao omba: botanu boya Mungu. <sup>25</sup>Yesu akaima ee lao: ngalaka kimia. Foaka kati ea ono buto. <sup>26</sup>Bolimo bobo bokafoa ambë ono buto, la lobilisomo likama, la akamama la limiki lifi. <sup>27</sup>Batotina bakamuala, bafelakana bamoi la basia: lao imbe asë ingië? lao liekesi lisia lië! akafa toshosha ke bokoita kota belimo e-be la bakalitisaë! <sup>28</sup>Ko onga lokuku linde lokaka fafana ta beki betotina bië bitimbi ta Ngalilai. <sup>29</sup>Efoakaë ta mbele e-Mungu, bö la bë baya Yakobo la Yoani, bakao-ota ta mbele eya Simona la Andele. <sup>30</sup>Nango aya boali aya Simona akbaka ilo, ani ambe la etabo; ta bindo la mangu baka beisa Yesu. <sup>31</sup>Yesu akaka ambe botaali akaundaë boo, akaemalisaë la etabu lokasila; la botaali akakuelaë. <sup>32</sup>La likolose etiamaka liso li bosë, baito bakaeselaë be ngbo itotina la beke bambaka la belimo-ebe. <sup>33</sup>Baito batotina ba boki bakasondjama ta boinda. <sup>34</sup>Akauwisa baito ba nbgo itotina ibofoono la befoono; la ee akafoa belimo-ebe likama, eë akafekila belimo obeka, okalo baluakaë. <sup>35</sup>La nongonongo; felo ii lowa obana akalingoa, akatomoa akaka ta eseke lo liombebe, la akasembola. <sup>36</sup>La Simona; la beke ba mbaka linde bakalukaë. <sup>37</sup>Bo, ta mbile bakaoshaë, bo lao: baito batotina batolukoë. <sup>38</sup>Akamutoela bo: lao toekëi, kotabeki befi be sia, lao lokokomise mboli ilö elamo; loye loka loamo. <sup>39</sup>La ee akaka okanangola ta Ngalilai etotina ta mbele-e-Mungu la akafoyaka belimo-ebe. <sup>40</sup>Buto amoi ono ambe la wale bo baëndi akaya ambeë, akabeka la akashoelaë balui se felo inde ta limiki li limesila: akabeisaë, imba lao olangi otanisei. <sup>41</sup>Yesu akaokelaë ngandi, akanyanyoelaë boo, la akaundaë; akabeisaë otanisemo. <sup>42</sup>La mangu baendi bakafoä, akatanisomo. <sup>43</sup>Yesu abeka linde oibeisaka, buto lioi ango limoi; <sup>44</sup>la akabeka: kaeniseke bindo biaö ta bekumi, la ofe biongo ke ani ebekaka Mose okalo otanisemo a mboë, imbe ta baito. <sup>45</sup>Ko ono buto, akaka oka-akola obeisa baito la omelanisa mboli yamo, loka lo, Yesu ailongi otomoa ta boki, angalaka lousa, la lilui, la ta liombebe, la baito baka-esakana ambeë, ta fangi itotina.

## 2

<sup>1</sup>Mbisa i-basio ba moi, Yesu akainoa ta Kafenauma akaoka mbo ambe ta mbele, <sup>2</sup>Baito ba bule baka sondjamana, okalo oto eseke ango ta boinda, onangoela bo mboli. <sup>3</sup>La ongoma bakaeselaë buto a bokolo ba ngbeli, ono atolomoko la baito ba nati. <sup>4</sup>Ani batilonga oyo tina line okalo lotukela e-baito, bakaena likolo lifola ta mbele ene ba ngalaka, bakafandola losambu lo mbele elo embaka Yesu, la bakasuluisa litamba lieke lilalelaka buto ono aongba bakolo. <sup>5</sup>Enaka Yesu, akaena limeli liboë akabeka la buto ono aongbeli bakolo, lao wana, mbeko ibe yao isiomesilomo. <sup>6</sup>Bandiki ngoto ba moi baka ngalase elo, bo bakata feë ta betema bibo. <sup>7</sup>Okalongi buto ono aobeka ani? Aoseola Mungu. Ndai atolonga omesila ndjaso ibe sakolo ko Mungu engene? <sup>8</sup>La eluwaka Yesu ta botema winde lao baotana feë ongoma, eë akalika o-ota feë ta botema bino ta ndjaso ibe oka logi? <sup>9</sup>Loni losieta la bolembu, ke obeka ta buto la ono angbeli bakolo lao ndjaso yao ibe yo-omesilomo; ke obeka linde lao, emalaka, ilaka litama liao, la ka-aka? <sup>10</sup>Oka uluwe lao wana a buto ambe la ishosha iyomesila ndjaso ibe. <sup>11</sup>Lotobeka la buto angbeli bakolo, emalaka, ilaka litamba liao, la ka-akata mbele ao. <sup>12</sup>Aka emala la mangu eë akaosa litamba linde la akatomoa felo ii batotina la bo baka binela Mungu. Bo lao felo toitakaenaka ani. <sup>13</sup>La ongo akaka lisia ta ngonge eë libande la linginda li baito baka songamana ambeë aka-andja oekisa. <sup>14</sup>Etakaëta boki, akaena Lewi, wana aya Alafayo ani angaliseë ta esendjolo lo bosombi. La akabeka linde lao: tutekei. Lewi akaemala la aka tutaë. <sup>15</sup>Ke embaka Yesu engalakaë ta mesa ta mbele eya Lewi, linginda li baito la baioto ba lingali libe bakangala aloko linde ta mesa, kola baeki ta mbile embaka bo likama la otutaë. <sup>16</sup>Enaka ba-andiki ngoto la Bafalisayo ani atola bieka

la baito ba bule labaito ba liuwi libe, bakabeka la boeki: oka longi otola la otomwa la baito ba bule la be bauwi libe?<sup>17</sup>Yeke Yesu akabeka libo lao: beke bambe la besasu baitolukaka be-nganga ,kanga bambe la biale. Ei loiyeli oyata be baengani, kanga be ba ndjaso ibe.<sup>18</sup>Baeki baya Yoani, labe ba Bafalisai bato kila, la aloko ebao ndo kilaka? <sup>19</sup>Yesu akamutoela bo: balesani la ono atosonga baengani okila bieka ani bambe eseke lomoi la bosongi? Etongala bosongi eseke lomoi libo yeitolongana kelao ba kile bieka.<sup>20</sup>Basio be batoya la aiti ale lino la ta elo mbile otkilai bieka ta basio bamo. <sup>21</sup>Buto koamba isali ii bolangiti boyai la isali i-tulu ene ekaolemba, kola ongoma isali i-bolangiti boyai yo kofa-aka isali ye ikaongba, layo komba la lifola.<sup>22</sup>La buto aito angola baana ta bibengu bitanu bibengu bië bikasi-umoa baana komba la bokaku, la bo koutama seë la bo kongba bule, baana bayai batotomoko ta bibengu biyai. <sup>23</sup>Ikomaka, lisiö li Yenga bakatenyanya elanga lo bakokosi, baeki binde, baka kola ofoya keke. <sup>24</sup>Bafalisai bakabekelaë, osiena otefolai liiti li yenga okalongi?<sup>25</sup>Yesu akabeka libo lao, oitaka tangela leke loakolaka Dawidi mbile engalakaë la semba, eë la beke bangalaka linde, mbile engalaka bo linde eseke lomoi. <sup>26</sup>Ke ani eotaka bo ta mbele e- Mungu, ta mbile eya bokumi Abiatata, akala lituma lië tambaka ta mesa eya Mungu, lieke liatimba liola sakoloko ko bokumi engene, eë akafala be bangalaka linde eseke lomoi.<sup>27</sup>Yesu akabeka: lisiö li Yenga likelomo okalo lo baito, baito baikalemu okalo Yenga. <sup>28</sup>Okalo ongoma wana a buto eë ambe bokota bo Yenga.

### 3

<sup>1</sup>Yesu akaota felo ta mbele-Mungu. Akaosha buto awale bo boo. <sup>2</sup>Bakamoilana lamba Yesu, atouwisaë ta lisiyo li yenga: oluka oambae.<sup>3</sup>La Yesu akabeka la buto a wale bo boo: emalaka, elo katikati. <sup>4</sup>La akabeka: Ombe la ishosha, lisiyo li yenga, iowa bolo ao bobee? , louwiso buto ao loito? Bakangala aii.<sup>5</sup>Ye aloko akakendisa baiso binde likolo libo la lisomi, akaoka ngandi, la litina li tale i-betema bibo, abeka la buto awale: nyanyolaka boo wao. Akanyanyola la boo bokauwa. <sup>6</sup>Bafalisai baka tomowa, la wakati baka moila bofindi boya Elondi loka londole elinbga.<sup>7</sup>Yesu akafoa la baeki binde, ta libande lifi. Likama li baito likatutae ta Galilai; <sup>8</sup>La Yunda, la Yelusaleme, labe ba Idumeya, ta ngambo ee Yuludani, la tina la Tiro la Sidoni, likama bakaokae ye ambaka okela bakaya ambee ta itotina ye akelaka, bakaya ambee.<sup>9</sup>Akabeka la baeki binde lao ba komanyelee yatato, loka tukela ei-amakae. <sup>10</sup>Litina, liani euwisakae likama li baito, batotina be bambaka la biale baka tukumelae likolo linde loka loundae.<sup>11</sup>Belimo-ebe, bekaenaë beka suluelae se felo inde, la omama: Ombe Wana aya Mungu. <sup>12</sup>Layamo akabeisa bo la wewe lao ndobeisakae ta fololo, loka looluwaë.<sup>13</sup>Akalila lisia ta longo; akata be balangaka la bakaya tina linde. <sup>14</sup>Akapanga ta liou la baele, loka bambe linde, <sup>15</sup>Oka, otoma bo okanangokola, la bofoka bo osaya belimo-ebe. <sup>16</sup>Obe liou la baele, be akapangaka: Simona, akatomo Petelo;<sup>17</sup>Yakobo, wana aya Zebendayo, Yoani, nduku aya Yakobo, akafa bo lina Boanelege, litina lao wana a bokumu; <sup>18</sup>Andele; Filipino; Balatolomayo; la Matayo; la Toma; la Yakobo, wana aya Alafayo; la Tadayo; la Simona buto a Kanana; <sup>19</sup>La Yunda ono a Keliota, ono akambaka Yesu. <sup>20</sup>Akaoto la mbele, tukela e-baito ekasanganisomo lisia, la yamo baikaosha ndole eola. <sup>21</sup>Eokaka baise baya Yesu, ongoma bakaya lao baosee ; bo lao: aiti la litina. <sup>22</sup>La baandiki ngoto, be basuluaka ta Yelusaleme, bakabeka linde lao: afoetolomo Bezabula; imbe la bokota bo belimo-ebe ndjoo ato saya belimo-ebe.<sup>23</sup>Yesu akata bo, la akabeka libo ta bembila: kembo Satana ye ko-engana osaya Satana? <sup>24</sup>Imba lao bokota bmoi bo anamane ta wamo angene wo bokota boimbo emala ale; <sup>25</sup>La mbele emoi efoanana ta amo angene, elo mbele embo emala ale.<sup>26</sup>Imba lao Satana asianamana ta engene, atovemaela ale bofoka winde botosila fee! <sup>27</sup>Buto aimbo ota mbele ebuto a bo bofoka la loseiso biongo binde, kondoenae okanda oko buto a bofoka felo io be bisa biongo ta mbele inde.<sup>28</sup>Lo beiseenu ta wewe, bebé betotina beto mesilomo ta bana ba baito, la ba kueli ndjaso ilisoli; <sup>29</sup>La! lamba oni atomola bolimo botanu aimbomesilomoko: ye aokba la zambi e-yalayala. <sup>30</sup>Yesu akabeka loka babekaka lao: ambe buto ono atolani la bolimo-obe.<sup>31</sup>Ekayaka inango la ba nduku binde, bee, baemalaka lousa, la baka kusae lioi. <sup>32</sup>Tukela ekangalase la olingilae, la bakabeka linde lao: ine, inango laa ba nduku bao bambe lousa la ba toiyoloe.<sup>33</sup>La aka mutola bo: ndai ambe inango angë, la ba nduku bangë? <sup>34</sup>La, aka moila likilo libë bangalakasee tina linde: obe, bekaïase, inango la ba nduku bangë. <sup>35</sup>La, buto ono atokelakëani elangi Mungu, ye oko ambe nduku, welo, la inango angë.

### 4

<sup>1</sup>Yesu loakola, oekisa ta ngongë e-libande lifi, linginda li baito boka lingilaë la akakba ta wato, ta libande lifi la lingida li baito bangalise ta ngonge. <sup>2</sup>La akaekisa bo ndjaso i-bule fafo ta bembila.<sup>3</sup>Okakai ta liekesi, bolobi akoloba mbeku. <sup>4</sup>Elobakaë mbeku, bimoi bikakba se ta ndole la noli bakayola yo. <sup>5</sup>La isia ta elela lo batale oto nyele likama; ikatomoa la mangu okalo yaitimba la nyele bolundu.<sup>6</sup>La eyaka lowa ifitika yamo ika bebela,okalo oto bili. <sup>7</sup>La isia lokbase ta keke: limo keke ika nyeila mbeku, yamo yei-boti mbeku.<sup>8</sup>Isiä lokbase ta nyele ilo, yamo ikatoloa ikata mbeku likama, bimoi tuku- isaso, imoi tuku-liambe, imoi mia-emoi. <sup>9</sup>Akabeka lao ono ambe la batoi, lokalo looko, ao-keke.<sup>10</sup>Engalaka Yesu la baeki binde bo angene, labe bangalaka libo liou la baele: bakafelaë loaso lo bembila. <sup>11</sup>Akabeka libo lao imbe ambenu ndjaso yeke iisomu ii bokota boya Mungu; yamo koisolomo; nde beke bambe lousa lo ndjaso yamo kobekomo la bembila. <sup>12</sup>Enakabo la omile la ani baitoena, lao baokeke ko liokela ko ndo luwa litina li mbeko, okalo bokota baitoluwa, okoka langana ke lao zambi ibo imesilomo.<sup>13</sup>Akabeka lisiä lao oiluwii litina li bembila? <sup>14</sup>Bolobi atoloba lioi. <sup>15</sup>Baito bamoi bambe ke ndole ene elobomoko lioi, ba tooka, la mangu Satana akoya oyafoya lioi liëke lilobomoko ambe bo.<sup>16</sup>La basia bambe ongoma bato-osha mbeku ta biseke bi batale etoka bo lioi, batoimila la mangu la limengo. <sup>17</sup>Ani baiti beili ta katikati ibo baiti la lokukomo batoumoä ngo mbile ekikelike, etoya tale la lokongolomo okalo lioi, la mangu ekokba ilingila.<sup>18</sup>Basia bambe ke beke baka lobomo ta keke bato-oka lioi. <sup>19</sup>Imba lao bifembi bi wenda lilimbi li bieto la yeme i-biongo gi sia bio koinyamila lioi, la lioi ndo bota mbeku. <sup>20</sup>La bamoi bambe be balombomoko ta nyele i-tanu, bato-oka lioi, ba tota mbeku,

ba moi mbeku tuku i-saso, tuku liambe, ba moi mia emoi.<sup>21</sup> Akabeka libo lisia: Yoko la tala aö loka osele sekala eleka, aö sekala e-litamba? Yeiti mbo osele amo ta ebaniselo? <sup>22</sup>La, yaiti laleka lotoisoma. Kembo ndoenisomo, oto lobeko le loisomoko kolaö loenene fololo. <sup>23</sup>La ono ambe la batoï baoka aokeke. <sup>24</sup>Akabeka libo lisia: mbakaï laweli taye itokenu, bambo pimeke-enu ta ikbelo ye-enu otokbeëlomoï, la ongoma ito kbeëlemo enu la botaliya ambenu. <sup>25</sup>La baofaya taono ambe layo, la ono aiti layo basoka yeke ambe layo. <sup>26</sup>Akabeka lisiya: imbe la bokota boya Mungu. ke buto amoi atokusa mbeku ta nyele, <sup>27</sup>Ono atokpa ilo ato lingowa, lotiyo la lowa, mbeku ye ikalobo moko la ikatomoisa batombo alui angu eni kanda ekatomowa. <sup>28</sup>Nyele ikatomoisa tayo engene, felo isandu, mbisa betaä, la tunga mbeku ika bota ta betaä. <sup>29</sup>La etoka mbeku okosela ta e-bongo mbo eula losiengana. <sup>30</sup>Akabeka lisiya: langi totopima la bokota bo ya Mungu aö laboni boni bombila totoenisawo? <sup>31</sup>Ambeke lombeku lolombase, le okaoloba ta nyele, imbe ikikelike ta mbeku itotina ye imbe tanye; <sup>32</sup>La, elobomoko lo lokatomowa, lokamba lofi ke tosandu tototina, la tokaana betaä la noli ibose ikamba ongala ta eseke lolifiöfiö. <sup>33</sup>La bembila bebule, ta bofono we akabeka ta baöi, ta beke bambaka la kanda eoka. <sup>34</sup>Aimbo bekelaka bo ndoena bembila, la, ta engene akabeikisa bo itotina ta baeki binde. <sup>35</sup>Kolalisio liamo la likolase, Yesu akabekalibo: etekai fangi esiya. <sup>36</sup>Mbisa ioshaya linginda libaito la bakaeselaë ta wato, ete embakaë, imbaka loko lo wato besiya bambaka linde. <sup>37</sup>Akaoshama la lofofofo, la ba tutu ba ngumba bakautama ta wato, la ani bakaowala oko. <sup>38</sup>Linde, alalise ta wendo, ateli bootchoe ta libonga otchoe. baka lingoisaë, la bakabeka linde: Boekesi, oïbangakaï kembo toto linda? <sup>39</sup>Mbile ekalingowakaë, aka-amila lofofo, akabeka labande lifi: ai! ngalaka ai! la lofofo lokatamba, la lokangala ai. <sup>40</sup>La akabeka libo: lokaloingi ombei la bowa? limeli lino limbe koani? <sup>41</sup>Bo bambaka la bowa likama, la bakabekana bamoi la basia: ono ambe ase ndai, kembo lofofo la libande lifi liö litisaë?

## 5

<sup>1</sup>Bakomaka ngambo ene moi ee libande lifi, taboki bo gogelasa. <sup>2</sup>Mbile Yesu aitimba ta wato, akaena felo inde botolome amoi, atofowa tambila, ambaka labolimo obe. Botolome wamo ambaka lambele inde tambila, la uto anga amoi aitimba laofoka bokandaë beliki, imbe labonyololo. <sup>4</sup>Eoka mbile itotina ambaka labenyolo ta bakolo labakakandaë labenyolo, kolaongoma akatenaka benyololo la lobuno, buto angu amoi aikamba labofoka bo kandaë. <sup>5</sup>Ambaka ongoma, lotiö lalowa, ta mbila likolo lifongo, atomama, salaka lokomba labatale. <sup>6</sup>Enaka Yesu la esika, akalela mangu, akauma balui felo inde. <sup>7</sup>Akamama lalioi lilikama: imbe ingi aiteni yange mbo, Yesu, wana aya mungu ono ambe ta bose? Lobeisaë ta lina liya Mungu, oilewisekei. <sup>8</sup>Ta ongoma Yesu akabeka linde: fowaka ombe buto ono, bolimo obe. <sup>9</sup>Linde, akaiyolaë: lina liö ndai? Legiona lina liange, akamutolaë, kola ongoma tombe babule. <sup>10</sup>Akata lisomboli mangu mangu akesa belimo taboki bosiya <sup>11</sup>Imbaka elo, fangi elongo, linginda lifi lifi lingulube bambaka batoeta. <sup>12</sup>Lambisa bolimo akasembola, lalobeko: tomeke esu taye ngulube, mbisa toete tabo. <sup>13</sup>Akaimila bo. Bolimo-obe bobekafowa bakaota ta ngulube, laongoma linginda likaka mangu okasuluwa ta libande lifi: Bambaka tina labilefu biele, bakaka okalinda ta libande lifi. <sup>14</sup>Bakambaka batoenaë, bakaka mangu, laokabeisa bo lobeko lamo taboki bofi latakonda. Baito bakaka okaena ani ekakoma lobeko. <sup>15</sup>Bakakoma tina la Yesu, libo bakaena bolimo obe, ono akanya Legiona, angalise, abati tulu, baenyeli balo; bakatuma la benyololo. <sup>16</sup>Be baenaka ani etakalo bato beisana ani ekomaka bolimo ta ngulube. <sup>17</sup>Tayamo bakamba batobeka la Yesu afoë ta boki wibo. <sup>18</sup>Ani elilakabo tawato, ono ambaka labelimo akaiyolaë mbo atikale linde. <sup>19</sup>Yesu aikaimilelaë, akabeka linde kaaka ta mbele aö, ta baito baö, obeise itotina ye ikakela Yesu loka laö, owe, ani ekaokelaë ngandi. <sup>20</sup>Akaka, akamba atobeisa bo itotina ye ikawela Yesu akabeka mbo batotina bakamba ta limwali. <sup>21</sup>Yesu ta wato atoleka fangi esia linginda libaito bakaya tina linde; Ani angali tangonge elibande lifi. <sup>22</sup>Kolaongoma bakumi, bambele Mungu, lina mbo: Yailo, akasuluäse felo ibakolo binde; <sup>23</sup>Akalombokolaë akalengela lisomboli: embo: wana otaali ange, ambetina la lingba, yooko, oya taliëlaë boo, lokambo auisomo, la ambe la liwawi. <sup>24</sup>Yesu akaka linde, la linginda libaito bakatutaë bo baka amakana linde. <sup>25</sup>Kolaongoma botali amoi ambaka la wale boena ngelo kilalisiö miaka liou la ye. <sup>26</sup>Akaenaka wale likama ta bao ba benganga befi, la akasilisa itotina ye ikambaka linde, la aikaosha angu itotoko iliuwesi, la wale bokaka la felo. <sup>27</sup>Eokaë lokuku loya Yesu, akaya ta linginda libaito mbisa inde la akaunda tulu inde. <sup>28</sup>Ooka abekaka mbo: launda anga tulu inde, ei kouwa. <sup>29</sup>La mangu ngelo ika omela toü, akaoka ta lokomba mbo aopata bosasu ta wale winde. <sup>30</sup>Yesu akaoka mbo bofoka bofoö ambeë, la, akakikowa ta linginda li baito akabeka ndai aka unda tulu ange? <sup>31</sup>Baeki binde ba kabeka: otoena linginda li baito lilingioë, la otobeka mbo: ndai akaunde? <sup>32</sup>Akamoi la fangi la fangi, inde, aene ono akawaë ongoma. <sup>33</sup>Botaali, akabanga, la akabilima fafo, akaluwa yeke ikaetaka ambeë, akaya oya suluäse felo ibakolo binde, la aka beisaë itotina ta wewe. <sup>34</sup>La Yesu akabeka: wanange botaali, limeli liao lisuisoweë; kaaka, kimia la osiuwa. <sup>35</sup>Mbile akabeka lisiä, bokumi bo- mbele Mungu, bakabeka: linde mbo wana otali aongba, loka loingi otoangaisa baekesi? <sup>36</sup>La Yesu, aikaoka baöi bibo, akabeka la bokumi bo mbelemungu: oïbangaka, imilaka angu. <sup>37</sup>La aikabeka la buto angu amoi ake linde, kangango ko Petelo, Yakobo la Yoani nduku aya Yakobo. <sup>38</sup>Ekomakabo ta mbele ee bokota bombelemungu, oko ekaenaka Yesu linginda libaito batolela la batomama likama. <sup>39</sup>Akaota, la akabekelabo: lokaloingi otowai iyeli, la loka loingi otolelai? wana aingbeli, la ambe ta ilo. <sup>40</sup>Bakasekaë. la akatomoisa batotina lousa, akaosa ise la inango a wana, la be-bambaka linde, akaota elo engalaka wana. <sup>41</sup>Akaundae ta boo, la akabeka linde: Talitakumi, ilangi obeka mbo: wana botali emalaka, lotobeisoo. <sup>42</sup>Lamangu, wana botali aka emala, la akakenda; akambaka la miaka liou la ye: la akamwala likama fafo. <sup>43</sup>Yesu akabeka libo bikela biofoka, lokambo buto angomoi ailuwaka leka lamo, la aka bekambo bafe wana botali bieka biola.

## 6

<sup>1</sup>Akafowa ta eseke lamo la akaya ta boki winde engene la Baeki bakatuta ye.<sup>2</sup>Ta lisiyo li sabata akakola oekisa katikati i Esongamelo la baito likama beke baokaka ye bakamwala la limwali, bakabeka mbo aanye mbeko ye endei? weli we bofomo linde la bakuwa bafi likakelomo linde?<sup>3</sup>Yeitiye bokeli bo mbao la wana aya Maliya? yeiti ye nduku a Yakobo la Yose la Yuda la Simona ? Bawelo binde bataali baito liso eke? bakauma likulia loka linde.<sup>4</sup>Yesu akabeka libo mbo bonangoli atoeno lokuku ko ta boki winde angene la katikati i befindi binde la katikati i mbele inde.<sup>5</sup>Aitikela likuwa ango limoi libofoka elo,sakolo kotela inio i baito baoooh ba byale la ouwisabo.<sup>6</sup>Ye akamwala ta litina li boeno wibo bo liimeli.aka kenda okaekisa ta beki fangi la fangi.<sup>7</sup>Akata Ba liou la baele ambe ye la akakola otoma bo baele baele; akafa bo bokota likolo li belimo be lilo. <sup>8</sup>Akalaka bo mbo baiyosaka leka loka lo lokendo, sakolo ko itumbu, tinga boila, ndoena litanga, ndoena falanga ta bokoli; <sup>9</sup>Ndjo babatise bakolo bibo la bapapa, bibataka tulu ye.<sup>10</sup>Akabeka libo mbo, okafoitai ta mbele, umoakai onga tii kani etofoenu ta eseke lamo. <sup>11</sup>Yomba mbo ta eske losiya baitukumaelenu la baiyoki enu, tambile e lifoi lino fufulakai bouta bo bakakalaka bino loka lo libekelomu libo.<sup>12</sup>Kolaongoma bakatomoa okanangola mbo baito bakikole betema. <sup>13</sup>Bakatomoisa belimo bebe la bakauwa baito ba biale likama baina la bakauwisa bo.<sup>14</sup>Ekaokaka bokota Elode mbo lina liya Yesu liyo luwamana fololo, baito bambaka batobeka mbo, Yoani Bolufi aosila ofufuka ta lingba, litina liamo bakuwa baofoka batokelomo linde. <sup>15</sup>Basiya mbo, imbe Eliya, ndjo bamoi mbo, ye bonangoli bo bomuna bo banangoli kwala.<sup>16</sup>Ndjo Elode, ekaokaka ye lobeko lamo, akabeka mbo, Ei lokatena Yoani botchwé, ye oko akaosila ofufuka. <sup>17</sup>Elode akatoma baito okaunda Yoani la akakanda ye ta bonyololo loka loya Elodia, boali aya Filipino, nduku inde, loka mbo asongaka ye.<sup>18</sup>Yoani akabeka la Elode mbo, yeiyengani lao ongala la boali aya nduku ao. <sup>19</sup>Yamo yoko Elodia akaiyana linde la akalinga mbo aite ye. Ndjo aitolonga. <sup>20</sup>Loka mbo Elode abangaka Yoani la aluwaka mbo ambe buto a wewe la botanu, kolaongoma, akakuka ye. Ekaokaka Elode ye, ambaka la itoo ndjo akaoka ye la liomali. <sup>21</sup>Ndole ekalikolomo ta lisiyo li libotomu liya Elode oko ewaka ye elambo lofi ta baito binde la bakapiteni la basilikani la bangele ba Galilaya. <sup>22</sup>Wana botaali aya Elodia akaota, akabina bisha akaomalisa Elode la beke balaka linde. Ndjo bokota akabeka wana botaali mbo, Lengilekei loni leka olangi la lotofa lao.<sup>23</sup>Akalapela ye mbo, leka ango le otolongila, lotofa lao, imbe ende botuku bo bokota wange. <sup>24</sup>Akatomowa, akabekalainango indembo, Lolengile koni ingi? La akabinoisela ye mbo, Botchwé boya Yoani Bolufi. <sup>25</sup>Mangu mangu akaota elo embe bokota okalengila ye mbo,lolangi mbo ofei botchwé boya Yoani Bolufi likolo li loungu.<sup>26</sup>Bokota akamba la ngandi ifi, ndjo loka lo lilapi linde, la baito beke balaka linde, aitiengana ofeka. <sup>27</sup>Kolamango bokota akatoma bosilikani la bonoko mbo, aye la botchwé winde. Akaka, akatena ye botchwé, elo ta bonyololo, <sup>28</sup>La akatola botchwé winde ta loungu, la akafa yo la wainenge. Wainenge akafa la inango inde. <sup>29</sup>Ekaoka baeki lobeloko lamo, bakaya oyaosa boliyo winde la bakaka selia ye katikati ii mbila.<sup>30</sup>Batomomu, bakakoma tina la Yesu, bakabeisaë mbeko itotina ye ikawakaë laye ika ekisakaë. <sup>31</sup>Yesu akabeisabo mbo: yokoï tosiameï ta liombeï, ongaleïse inio. Litina imbe la babule batoka labe batoinowa, kolaongoma baenyele ango mbile eola. <sup>32</sup>Bakaka lambisa bakalila ta wato, bake okasima taliombeï.<sup>33</sup>Baito babule bakaenabo batoka labakaluwabo, tabeki betotina mangu labakolo bakaka bakaetaë ta eseke le lotoka bo. <sup>34</sup>Mbile etomoië ta wato, Yesu akaena linginda libaito, akamwala langandi, latina ani ekatikala bekoko beitiäle la bokuki; akambaka atoekisa bo mbeko ibule.<sup>35</sup>Mbile ekaka likama, baeki bakaya tina linde, la lobeko; eseke lombe liombeï mbile efoeta likama. <sup>36</sup>Beka libo, bainoë ta beki bibo bakaka luke bieka.<sup>37</sup>Yesu aka sanola: fakaïbo enu angene bieka. bakabeka mbo: tokeï esu angene oka somba bekati bofelo bo baito miya ye, laonga tofe bo biaka.<sup>38</sup>Aka beka libo: ombei la bekati byanga ka moileï, oluweï, bakabeka: bekati bembe liondo, la suwe ye.<sup>39</sup>Lambisa akabeka libo ba ngalese ta embili la embili ta liwa liesi. <sup>40</sup>Akaselabo ta bolenga bo miya la tuku liondo. <sup>41</sup>akaosa bekati liondo la suwe ye, la mbisa, akalilisa baiso likolo ta buse, aka lengila ngbengbele. akatena bekati, akafa baeki, baanele linginda. akaana aloko suwe ye ta baito batotina.<sup>42</sup>Baito batotina bakala la bakakuma. <sup>43</sup>La mbisa bakaya la lotshunga liou layele ibekati la ltochunga to suwe toye ikatikalaka bebekati la suwe.<sup>44</sup>Beke balaka bekati bambaka baito bilefu miya liondo.<sup>45</sup>Takani, akabeisa baeki balile ta wato bake felo inde fangi e libande, ta betesaida, mbile amo engene atobekana la linginda. <sup>46</sup>Akatoma bo bake, akaka ta longo akata lisomboli. <sup>47</sup>Lalikolase, wato bokambaka aïteni ilibanda lifi.<sup>48</sup>Enakae mbo baomba tatala iyoluka, lofofo lokanyabo tabisa ota lotiyo lotuku unati. akaka tina libo akakenda likolo lilibande lifi, akawa mbo aetebo. <sup>49</sup>Ekaenakabo buto atokenda likolo lilibande lifi, bakatanga keimbe bolimo bobo, bakakola lomamo, <sup>50</sup>Bakaenabo boätotina baenyeli bakabuyana bo.mbisa Yesu akabeisabo, taomongo: imbendeï, obangakai.<sup>51</sup>Mbisa akalila tawato, lofofo lokasila. Bakatikala lalimwali. <sup>52</sup>Ani eïkaluwa bo tokesa tobekati, bofelo betema bibo beimbaka la ofoka. <sup>53</sup>Mbisa iyolekisa libande lifi, bakaka taboki bo genesaleta,baka ongondjaë. <sup>54</sup>Talotomo libo tawato, bakaluwa lamangu Yesu, <sup>55</sup>bakakenda biseke bitotina, bakayelaë baito babiale tabandamba, biseke bitotina bi okaka bo mboli.<sup>56</sup>Tabiseke bisiä bikomakaë, tabeki befi ,bekikelike, imbe talokonda, batosela biale tabiseke bibaito batotina, batosombola aunde ango tulu. batotina be baundaka baka anya liuwesi.

## 7

<sup>1</sup>Bafalisaï la bandiki, bakafoa ta Yelusaleme, bakatoamana tina-tina la Yesu.<sup>2</sup>Bakaena basia ta baeki binde batola biëka bibo lani bao bambé la lilo, ilangi obeka lao; bao baikasoolomo. <sup>3</sup>Kolaongoma, Bafalisaï la ba Yuda bai-ëngani ola ko ndosoola bao, la welui la weli otutana la asili ibaito ba felo. <sup>4</sup>Tambile ekafoaka bo ta eseke lo baito batotina, bakambaka batola mbisa ilo-tanisomo . Bambe aloko ta tokpongbo tosia chueke toengani libo hamoile, ke lisooli li kopo, tuku la benyongo.<sup>5</sup>Lisaï la bandibki bakaïolaë: loka lo ingi baeki bao baitotuta asili i-baito ba felo, la batola bieka bibo ani bao bambé la lilo?<sup>6</sup>Yesu akamutola bo: baito ba lolanga, Isaya akatondola loka lino, la ika-andikomo: baito be bato litiseï ango ta benoko, kolaongoma betema bimbe esika langë. <sup>7</sup>Imbe ango bule batolitiseï, la oesa tokpongbo chue la ba-afa tombe

tobaito.<sup>8</sup>Ototikai bikela bia Mungu, la otmoila tokpongo to baito. <sup>9</sup>Akabeka libo lisiä: otoseisai bikela bia Mungu, loka lotitisa tokpongho chuino. <sup>10</sup>Yamo yoko, Mose akabeka: litisaka Ise ao la Inango ao, la ono atose-ola Ise inde la Inango inde atopata etumbo lo lingba. <sup>11</sup>Kolaongoma, otobekai: yomba mbo buto atobeka la Ise inde la Inango inde lotosungoo la yeke inyami, ilangi obeka, liano lima ambe Mungu, <sup>12</sup>oitotikai owa lekango lomoï loka loya Isea ao la Inago ao, <sup>13</sup>otobunai lioï lia-Mungu loka lo topkongbo chuino, laye okatai. la otekelaï mbeko isiä imbule yeke itutani la yamo. <sup>14</sup>Lambisa, okata linginda lisia tinatina linde, akabeka: okekeeni enuatotina, kochakaï la weli. <sup>15</sup>Yeke ito-ota ta buto, yamo yeitosesaë, kola ongoma, yeke itotomoä aiteni inde, yamoitoesa lilo. <sup>16</sup>Ono ambe batoi loka looka aokeke. <sup>17</sup>Mbile ekaotaë ta mbele, esika ta linginda, baeki binde bakafelaë litina li bombila. <sup>18</sup>Akabeka libo: enu aloko oiti la weli? oitakaluai litina liyeke ito-ota ta bonoko bo buto la yeito seisaë? <sup>19</sup>Lokambo yeke ito-ota ta botema bo buto, ito-ta sölo, la ito-eta malaemoï ta biseke bisami loka lokomanya bieka biso-olo. <sup>20</sup>Akabeka libo lisiä: yeke itotomoä ta buto, yamo itoseisa buto. <sup>21</sup>Aiteni e-butu, ta botema bo baito itotomaoä baenyeli babe, bolefe, lilalani, <sup>22</sup>wiba, bobbe, tale fafo, batongi, boeno bo liengani, lofolö, botema bobbe, loitano... <sup>23</sup>Bitotina bië bitolomoä aiteni i-botema, yamo i-toseisa buto. <sup>24</sup>Yesu mbisa i-onga, akaka ta boki bokumo Tulo la Sidona. Akaota ta mbele la baenyeli mbo buto ailuaka, laë aiti buto ao samana. <sup>25</sup>Botaali amoi, ono wana inde botaali ambaka la bolilo-obe, akaoka ba tobekela loka linde, akaya oyakusama ta bakolo bide. <sup>26</sup>Botaali oko ambaka ta i-bote i Geleke - Suliya ta Fenisiya. Aka lengilaë asaë bolimo-obe ta wana inde botaali. Yesu akabeka linde: <sup>27</sup>Tikaka koni bana ba ngene e-mbele ba kume so-olo, lokambo yeiyengani osa bieka bi bana bangene e-mbele ofa la bana ba ngba. <sup>28</sup>Hii, ngene ange, botaali akabinoiselaë, ye mboo, bana ba ngba sekala i-mesa batolaka mboko mbumbusi ye ito kpkasë. <sup>29</sup>Akabeka linde: loka lo limeli liao, kaaka, bolimo-obe bo-otomoä ambe wana botaali. <sup>30</sup>La mbile eka bino-akaë ta mbele inde, akaosha wana inde botaali alalise ta litamba, bolimo-obe bokaosila otomoä. <sup>31</sup>Yesu akatika boki bo Tulo, la akaya ta Sidona akakela ta libande lifi li Galilai, aka tenyanya ta boki Dekapole. <sup>32</sup>Bakayelaë la buto a looko, ono akambaka la boeno bo libeki la weli, la bakalengila linde atalieleë boo. <sup>33</sup>Akafoyaë ta linginda, akataë tonekele ta batoi, la akaundaë lolame la soi inde angene. <sup>34</sup>Akaila baiso likolo ta lobola, akabeka: Efata!, litina lao, likolamaka. <sup>35</sup>kolambile amo, batoi binde baka likolomo, la lolame linde loka likolama la akabeka la weli. <sup>36</sup>Yesu akabeka libo baibeisaka buto ango amoi; la baibekaka ta biseke bi baito ba bule. <sup>37</sup>Bakambaka ta limuali lifi, la bakabeka: atoa tokesa chue la okisa be-eko, la obekisa be baikambaka obeka.

## 8

<sup>1</sup>Tabasio bo, linginda lifi bakatoamana lisia la baikambaka la leka lola, Yesu akata baeki binde, la akabeka libo mboo: <sup>2</sup>lombe la ngandi fafo ta lie linginda; lokambo basio basao bambe tina lange, la baiti la leka lola. <sup>3</sup>Lokaobinoisa bo la semba; baitomba la befoka Lokaobinoisa bo la semba; baitomba la befoka tandole, la bamoi bibo baye esika. <sup>4</sup>Baeki binde bakamutola mboo: enikanda engani lao okumisa bo soolo la bekati, ta eseke lo liombe?pm to<sup>5</sup>Yesu akaiyola bo: ombei la bekati bianga? bakamutolaemboo, bosambale. Kolaongoma, <sup>6</sup>akangalisa linginda ta nyele, akaosa bekati bosambale la, lamisa ioesa ngbengebele, akabuna, la akafayo ta baeki binde loka banebo; la bakanela linginda. <sup>7</sup>Bakamaka aleko la inio ii suwe, la Yesu, akainoisa ngbengebele, akanela aleko bo. <sup>8</sup>Bakala la bakakuma soolo, la bakatola tochungu bosambale tondobilo ta bikende bieke bitikalaka. <sup>9</sup>Bamaka baito elefu inati. la mbisa Yesu akabinoisa bo. <sup>10</sup>Kotambile amo, akaota ta wato la baeki, bakaaka fangi ee Dalamanuta. <sup>11</sup>Bafalisai bakatomoela ye, la bakakola otana fie la Yesu, loka lokotae, la ofelae ndembe emoi ene ofoa ta lobola. <sup>12</sup>Yesu akasuma ta botema winde, la akabeka: lokaloingi fecho ene batolengila ndembe? wewe lotobeka lino, yeiti la ndembe embofomoko ene fecho. <sup>13</sup>Akatika bo, la akaota ta wato lokalolekisa fangi ebaele. <sup>14</sup>Baeki bakalendja oosa bekati; la bakambaka ngo kolaemoi ta wato. <sup>15</sup>Yesu akafa bo limutoli: la weli la benyeli ba bafalisai la be baya Elode. <sup>16</sup>Baeki bakaenyela bo angene, la bakabeka: lokambo toiti la bokati. <sup>17</sup>Yesu akalua bo la akabeka libo: lokaloingi otoenyelai lokambo oiti la bekati? <sup>18</sup>Ombei la baiso la oitenai? ombei la batoi la oitokai? la oiti la weli? <sup>19</sup>Mbile lobunaka bekatibosambale loka lo baito elefu liondo, to chungu chuanga otikalaki layo la yeke otolakai? bakamutolae mboo: liou la ye. <sup>20</sup>Lambile lobunaka bekati liondo loka lo baito elefu inati, tochungu totikalaka chuanga? bakamutolae mboo: bosambale. <sup>21</sup>Lakabeka libo: oitakaluai amboko? <sup>22</sup>Bakaaka ta betesaida; la bakayela Yesu buto a botuku, bakalombokolae aunde ye. <sup>23</sup>Akaunda butu a botuku, akaaka linde ta boki; akata soi inde ta baiso binde, la akatelaë bao, la akaiyolae lamba afoena inio? <sup>24</sup>Akamoila, la akabeka: lofoena baito ke tosandu, totokenda. <sup>25</sup>Yesu akatae lisia bao ta baiso; la mbile buto a botuku akamoila eseke lomoi, akauwa, la akaena leka lototina la lichuanisomo. <sup>26</sup>La Yesu akatomaë ta mbele inde, akabeka: oibinoakale ta boki. <sup>27</sup>Yesu akaaka la baeki binde esekelomoi, ta bieki bi Kaisalia boa Filipino, la bakaiyola lofelo ta ndole: Enu otobeka mbo ei lombe ndai? <sup>28</sup>bakamutolae mboo: Yoani bolufi; basia mboo, Eliya, basiamboo amoi ta banangoli. <sup>29</sup>La enu ase akaiyola bo, otobekai mbo lombe ndai? Petelo akamutoelaë: ombe Kilisito. <sup>30</sup>Yesu akafa bo litomomu mbo baibekelaka buto ando amoi. <sup>31</sup>Akakola obeisa bo mbo iyengani la Wana buto aoke wale likama, akusomo ta biange, la bekumi, la bandiki la atoitomo, ee lambisa atofufuka mbisa ii basio basaso. <sup>32</sup>Akabeisa bo mbeko folele folele. La Petelo, akaosae ta ifokolo, akabeka linde lisia. <sup>33</sup>La Yesu akabinoisa lambisa la akamoila baeki binde, akamamila Petelo akabeka: Binoaka la mbisa yange, Satana loka oitoenyelisa mbeko iya Mungu, ombe ango la baenyeli ba baito. <sup>34</sup>Akaata linginda eseke lomoi la baeki binde, akabeka: buto ono ambe la yeme iotutei, afekeke koni engene la aileke lieka linde la atutekei. <sup>35</sup>Ono asami ouwisa liwawi linde, atobungisa, la ono atobungisa liwawi linde loka lange, loka lo mboli itanu atouwismo. <sup>36</sup>Eni litina limbe ta buto aoshe bitotina, la akose liwawi linde? <sup>37</sup>Loni leka buto aengani okikoisa la liwawi linde? <sup>38</sup>Lokambo ono atokei soni la baoti bange aiteni ene fecho ee baito ba belefe la bobbe, Wana a Buto atoka lekowe soni etoyae ta bofoka boya ise Inde la bakitomo be baengani.

## 9

<sup>1</sup>Akabeka libo lisiya mbo: Lo'obeka lino ta wewe, bamoi ta bee bambe eke baitongba ango, kanda toene bokota boya Mungu bo'oya la bofoka. <sup>2</sup>Mbisa ii basiyo liambe, Yesu akaosa Petelo, Yakobo la Yoani, la akakesa lao angene ango ta longo. Akakikowa felo ibo, <sup>3</sup>tulu inde ikamba la bongei, la bofufu likama, oto butoeke ta nyele ekoengana ooso'ola yo ongoma. <sup>4</sup>Eliya la Mose bakatomoela bo, bakabekana la Yesu. <sup>5</sup>Petelo akabeka la Yesu mbo: Labbi, iyengani liso ongala eke, tokele bambau basaso, limoi loka lao, limoi loka loya Mose, limoi loka loya Eliya. <sup>6</sup>La aikaluwa ingi atobeka, loka bakambakala la bowa likama. <sup>7</sup>Liumba likaya oyaufa bo la lilima, ta liumba limiki likaokana aiteni ii liumba mbo: Ono ambe Wana ange bosamomu, okakai ye! <sup>8</sup>Mangu-mangu, bakamoila fangi esiya baikana buto, sakolo ko Yesu ambaka tina libo. <sup>9</sup>Mbile esuluwaka bo ta longo, Yesu akabeka libo mbo oibeisakai buto ango amoi leka okaenai, kota lisiyo litofufuka Wana a Buto ta bangbei. <sup>10</sup>Bakalitisa lioi liamo, ndjo baka'akola ofelana bo angene mbo: Litina li lifufuko ta bangbei mbo ingi? <sup>11</sup>Baeki bakaiyola ye le lofelu: Loka loingi baandi batobeka mbo iyengani koni la Eliya aye felo? <sup>12</sup>Yesu akabeka libo mbo: Eliya atoya felo loka lo'ota mbeko itotina alima. La loka loingi isonomu mbo Wana a Buto ato'oka bomusi likama la batofeka ye? <sup>13</sup>Lo'obeka lino, Eliya aosila ona ko'ala, baito baosila okela ye ani balangi, otutana la ani ikasonomo ta lokasa. <sup>14</sup>Ta mbile bakakoma tina la baeki bee amoi, bakaena tina libo linginda lifi la baandiki batokela fiye la baeki. <sup>15</sup>Mbile linginda bakaena Yesu, bajamwala, la bakaka mangu loka lofa ye kalibo. <sup>16</sup>Akaiyola bo: Enu libo ototanai fiye loka lo loni lobeko? <sup>17</sup>Buto amoi ta linginda akabinoisela ye mbo: Boekesi, lokayaka la wana ange botolome ambo we, ono ambe la bolimo ba ebebe batokanda ye bonoko. <sup>18</sup>Biseke bitotina atounda ye, atokusela ye ta nyele; wana atomomowa fulofulo la atowa ngelete, bindo binde bitpundamana. Loka lo'olengila la baeki bao basaye bolimo wamo, baikalonga. <sup>19</sup>Yesu akabeka libo: Ooh'! Baito baiti la liimeli. Kota eni mbile lotongala lino? Kota eni mbile lotolewa ta mbeko ino? Yokoi la wana eke ambei. Bakaya linde ambe ye. <sup>20</sup>Kota mbile akaena Yesu, bolimo bokayeya wana tale, akaumana ta nyele, la wana akatimba ta nyele, fulofulo ikatomowa ta bonoko winde. <sup>21</sup>Yesu akaiyola ise inde mbo ta mala yanga itokelaka ye ani? Kota wainenge winde. <sup>22</sup>Mala likama atokusa ye ta imbe la ta baye loka loita ye. Yomba mbo oengani okela leka lomoi, sungeke'su la okeleke'su ngandi. <sup>23</sup>Yesu akabeka linde: Otobeka mbo yomba mbo oengani!... Itotina imbe oto bofoka ta ono atoimila. <sup>24</sup>Mangu-mangu, ise a wana akamama: Lofeimila! Sungekei ta boeno wange bo liimeli. <sup>25</sup>Yesu akaena linginda batoka mangu, akaesa baoi la bofoka ambe bolimo bobo, la akabeka linde: Bolimo bo ebebe la bo bo'oko, lofo ishosha: Tomowaka ambe ono wana, la oibinowaka ale. <sup>26</sup>La akatomowa, ani aomama, la akabilimisa ye likama, wana akamba kee boliyo, la beke bambaka batoena baka beka mbo aongba. <sup>27</sup>La Yesu akaunda ye ta boo, la akaila ye likolo. La akaemala. <sup>28</sup>Ta mbile eotaka Yesu ta mbele, baeki binde bakaiyola ta kpengbe mbo: Loka loingi toikalonga oosaya we bolimi bobo? <sup>29</sup>Akabeka libo mbo: Wo bolimo bobo boiengani ofowa kota ndole ee basomboli. <sup>30</sup>Bakaka elo, la bakatenyanya ta boki bo Galilaya. Yesu aikamba la yeme mbo baluwe ye. <sup>31</sup>La akaekisa baeki binde, akambaka atobeka: Wana a Buto atofomo ta bao ba baito, bamboitaka ye, la mbisa ii basiyo basasola atofufuka. <sup>32</sup>Ndjo baeki baikaluwa litina li baoi bamoi, la baikafela ye. <sup>33</sup>Bakatomowa ta Kapalanauma. Ta mbile embaka ye ta mbele akafela baeki binde mbo: Okambaki otowai fiye ta ndole loka loingi? <sup>34</sup>Bakangala haii, loka ta ndole bakambaka batobekela fiye loka loya ono aeti bofi. <sup>35</sup>Kola ongoma, Yesu akangala'se, akata baeki liou la baele, akabeka libo: Yomba mbo buto alangi omba a felo, atomba a liko ta batotina la bokowa bo batotina. <sup>36</sup>La akaosha wainenge, akata ye aiteni ibo akaunda ye ta boo, akabeka libo: <sup>37</sup>Buto ono atotukumaela amoi ta wainenge ono loka lange atotukumaela, aitatatukumaele ango, la aotukumaele aleko ono akatomei. <sup>38</sup>Yoani akabeka linde: Boekesi, toene buto amoi atosaya belimo bebe la lina liao, tokafekila ye, loka aikambaka eseke lomoi liso. <sup>39</sup>Yesu akabeka: Oifekilakai ye, loka buto ango amoi aiyengani okela ikesa ta lina liange, ndjo la mbisa a'akole obeka bobo loka lange. <sup>40</sup>Loka ono aitoemaele'su, ambe loka liso, <sup>41</sup>La ono atofe'nu kopo ee baye ta lina liange, loka ombai baya Kilisito, lotobeka lino ta wewe, aitobungisa lilipomu. <sup>42</sup>Ndjo, yomba mbo amoi atoumisa likukia ta amoi ta bee bainenge bakafoimila, iyengani linde okandomo litale lifi ta ngingo la kokusa ye ta libande lifi. <sup>43</sup>Yomba kembo boo wao bombe likulia loka lao, tenaka wo, iyondu ango lao o'ota ta bokota la boo bomoi, <sup>44</sup>la ongala la bao baele loka oke ta imbe, yeke yeito tiamaka. <sup>45</sup>Yomba kembo likolo lio limbe likulia loka lao, tenaka lio, kanga ango o'ota ta liwawi la likolo limoi, <sup>46</sup>la ongala la bakola baele loka okusomo ta geyena, ta imbe ye yeito tiamaka. <sup>47</sup>Yomba mbo liso liao limbe loka lao likulia, tenaka lio, kanga ango mbo o'ote ta bokota boya Mungu, la liso limoi, la o'ota ta geyena, <sup>48</sup>elo fiambo iyola lokoma yeitongbaka, la imbé ye yeito tiamaka. <sup>49</sup>Loka baito bototina batokomiomo ta imbe kee ani etokomiaka bo bieka ta bopka. <sup>50</sup>Bopka bombe leka lolo; ndjo liye linde likaosila, batokomia bio eni kanda? Mbakai la bopka aiteni ino, la mbakai la eyaii ta bamoi la basiya.

## 10

<sup>1</sup>Yesu akafoa elamo, akaya ta ikenge i-Yudeya la fangi enemoi e Yolodani; likama libaito bakasondjamana ambee, loka bikela bibo akakola oekisa. <sup>2</sup>Bafalisai bakaya, loka lopimae, bakakola ofela felo kembo botolome aengani oita libala la boali inde. <sup>3</sup>Akainoisela bo lao: Mose akalakeke enu loni lobeko? <sup>4</sup>Mose akafeke'esu ndole eosona lokasa lofoya botaali ta libala. <sup>5</sup>Kolaongoma Yesu akabeka libo mbo: loka lo betema bofoka bino yamo akatikelenu baoi bamoi. <sup>6</sup>Kolaongoma, koandja ta liomu li wenda, Mungu akabekela botolome la botali. <sup>7</sup>Kolaongoma botolome atotika ise inde la nango inde atongala eseke lomoi la boali inde. <sup>8</sup>Boya baele batomba buto amoi, kolaongoma batotikala leka lomoi. <sup>9</sup>Yamo yoko buto aiyana yeke Mungu akasela eseke lomoi. <sup>10</sup>Mbile bambaka ta mbele, baeki bakakola ofelaé elamu kati. <sup>11</sup>Akabeka libo mbo: botolome ono akaita libala la boali inde la kosonga asia, aochuelae nyongo. <sup>12</sup>Loka ikaomba mbo bootali amoi, mbisa

ioita libala la bolome inde, ekosonga asiya aochuelae nyongo.<sup>13</sup> Bakaya la bainenge ambeye loka aunde bo, kolaongoma baeki bakamamila beke bakayaka la bana.<sup>14</sup> Yesu akaena bo la akaoka bobo, kolaongoma akabeka libo: tikai bainenge baye eke ambei, oifekilakai bo, loka bokota bo ya Mungu bombe ke bo.<sup>15</sup> Lotobeka lino ta wewe ono akaimila bokota boya Mungu aiti ke wainenge aitoota.<sup>16</sup> Kolaongoma akaunda bana ta bao binde, akandja osemboela bo akatela bo bao.<sup>17</sup> Kolalaongoma Yesu akaeta ta ndole, buto amoi akaya mangu, akachua balui felo inde, boekesi bolo, akafelae: lokele isai loka lota ta bokota bo ya Mungu?<sup>18</sup> Yesu akabeka linde: loka loingi ototei bolo? yeiti la buto bolo sakolo Mungu engene.<sup>19</sup> Olui bikela: oitaka buto, oichuaka nyongo, oibaka, ndota mboli ilolanga, oipkolaka leka louto, litisaka ise ao, la nango ao.<sup>20</sup> Akamutoelae: boekesi ndjaso itotina yo lolembiliyo kota wainenge wange. <sup>21</sup>Yesu akamoilae la losamo akabeka yotikala leka lomo, kaaka la ungisaka bieka biao bitotina bieke ombela yo, kolaongoma faka tobube, la otocha ekukelo ta bose la yoko oya tutei. <sup>22</sup>Akasoma lokali lio lioi, la akaaka la ikenene ifi ta botema loka ambaka la bibongo likama.<sup>23</sup> Yesu akamoila fangi inde, la akabeka la baeki binde: imbe la tale baito ba lifoka oota ta bokota boya Mungu! <sup>24</sup>Baeki bakamoala ani Yesu abekaka ongoma. La akabeka libo lisia: bana bange. <sup>25</sup>Imbe tale ta beke batota baenyeli ta bafoka loka loota ta bokota boya Mungu. Imbe la bolembu likama Kamela oota ta lifola li iyolo la lifoka oota ta bokota boya Mungu.<sup>26</sup> Baeki bakamoala fafo, bakabekana bami la basia, ndai ase atouwa? <sup>27</sup>Yesu akamoila bo, akabeka: yoko imbe tale ta baito tinga ambe Mungu: itotina imbe la bolembu ambe Mungu. <sup>28</sup>Petelo akakola obeka linde; tene, esu tootika bitotina iso la totutoo.<sup>29</sup> Yesu akabeka: lotobekalino ta wewe, oto buto ono akatika okalange la okalo mboli itanu mbele inde, kee banduki, kee bawelo inde baatali kee nango inde kee ise inde, kee bana binde, kee nyele, <sup>30</sup>la atofomo mala mia kanikani ta wenda we, mbele, la nduki batolome, bawelo baatali, baima, bana, la nyele, kola biale aleko, la tambile emboyaka, liuwesi li laya laya. <sup>31</sup>Nde babule beke bakambaka betoli felo batomba bambisa; la be bambisa batoeta felo.<sup>32</sup> Bambaka tandole olila ta Yelusaleme, la Yesu ambe felo ibo, baeki bakamwala, la beke batutakae bakabanga. La Yesu akaosa lisia liou la baele, beke bambaka linde akandja obeisa bo lioi li ndjaso ye iyengani okomelae: <sup>33</sup>Moilakai, totolilai ta Yelusaleme, la Wana a buto atoitomo ta bao ba bekumi la baandiki- ngoto. Batokesae angbe, la batokesae ta bapakano, <sup>34</sup>Batotae ta bao batokesae ta baito ba wenda bosia, la baito batotae kungutu, baochuelae soi, la batoimae fimbo, la batoitae; mbisa ibasio basaso, atofufuka.<sup>35</sup> Bana baya Zebedayo, Yakobo la Yoani, bakaya felo iya Yesu, bakabeisae: Boekesi, tolangi okelelesu loase lototina leke totolengiloe. <sup>36</sup>Akabeisa bo; lokelelenu ngi? <sup>37</sup>Imielekesu ongola, amoi ta boo bo bolome la asia boo wao boali, tambile etongaloe ta taala ao.<sup>38</sup> Yesu akabeisa bo: oluwi loaso le lotolengilenu otolongai omwa kopo ene otomwei? La olufiomi la lilufi litolufiomo? <sup>39</sup>La Yesu akabeka libo: iyengani lino omwa kopo ene lotomwa, la olufiomi ta lilufi lie litolufiomo; <sup>40</sup>loka longala ta boo wange la boo boali, lo loaso loiti lange ofenu, la itofomo la beke ikaosila okomwelo loka libo.<sup>41</sup> Be liou, bakaoka ongoma, bakandja osomela Yakobo la Yoani. <sup>42</sup>Yesu akata bo lioi, la akabeka libo mbo, oluwi lao baito beke bakaotangomo betoli felo ta wenda basia batofekila bo la baito bafibibo loka bambela la ishosha ambe bo.<sup>43</sup> Yaiti ongoma ta katikati ino. ono atolanga ongala bofi ambenu, atomba bokowa wino; <sup>44</sup>La ono atolanga buto afelo ambenu, atomba bokowa bo batotina. <sup>45</sup>Wana a buto aiyeli lao bakuwele ye, kanga akuwele basia, la ofa liwawi linde angene kee liendoli li baito babule.<sup>46</sup> Limo bakaka Yeliko. la efoaka Yesu, la baeki binde, la linginda li baito, Batimayo, wana aya Timayo, botuku bo bolefe, ee angalakase ta boonga bo ndole lani atolengila bieka.<sup>47</sup> Akaoka lao Yesu a Nasaleta, akakola omama; Wana aya Dawidi, Yesu okelekii ngandi! <sup>48</sup>Baito babule bakaimae lao angale kimia; akamama la bofoka; Wana aya Dawidi, okelekei ngandi.<sup>49</sup> Yesu akaemala, la akabeka: takaie lioi. bakata buto a botuku, bakabeisaembo: mbaka la bofoka, emalaka, atotoo!<sup>50</sup> Botuku akakusa tulu inde, la akaemala mangu, akaka elo embe Yesu.<sup>51</sup> Yesu, akaosa baai, akabeka: Olangi lokeleloe ingi? Laboni, buto a botuku akabinoesela, lolangi loene. <sup>52</sup>Yesu akabeka linde: kaaka, limeli liao lifouwisoe. Kotambile amo akaena, la akatuta Yesu ta ndole.

## 11

<sup>1</sup>Ekambaka bo tina la Yelusaleme, ta Betefage la Betania, ta Longo lo Bilya, akatoma baeki baele binde, <sup>2</sup>Akabeka libo mbo, kakai ta boki we botomoilana lino, etotenu elo, otoanyai wana a bokoko akandomu, buto aitaka ngala koni likolo linde. Sombulakaiye la yokoi linde eke. <sup>3</sup>Yomba mbo buto atoiyolenu mbo, loka loingi otokelai ani, bekakai mbo Ngene ambe lamo la yeme la atobinoisa yo eke lisiya.<sup>4</sup> Bakaka bakanya wana a bokoko akandomu ta boinda bomoita ndole; la bakasombula amo. <sup>5</sup>Beke bambaka baemala elo bakabeka libo mbo, otokelai ingi eke etosombulenu wana a bokoko? <sup>6</sup>Bakabeka libo ani ebeisaka Yesu bo la bakafa bo ndole.<sup>7</sup> Bakaka la wana a bokoko ambe Yesu, batokusa tulu ibo likolo linde, la akalila lamo.<sup>8</sup> Likama li baito bakakendja tulu ibo ta ndole, basiya bakakendja betaa be isandu bieke batenaka ta bilanga. <sup>9</sup>Bakakenda felo la bo bakatuta lambisa ani batomama mbo, Osana! Ono atoya la lina liya Ngene autcholomoko!<sup>10</sup> Bokota boya Ise iso Dawidi botoya autcholomoko! Osana ta biseke biyeti likolo.<sup>11</sup> Akakoma ta Yelusaleme la akaota ta Tepelo. Ekasilaka ye omoila fangi la fangi, akatomowa oka ta Betania eseke lomoi la Ba liou la baele, loka mbile eetaka.<sup>12</sup> Ta lisiyo li mbisa, eko efoaka bo ta Betania, ye akaoka semba.<sup>13</sup> Ekaenaka ye isandu i mosuke la esika, bombaka la ngoto, akaka tina okalinga mbeku lamba atoosha. Ekakomaka ye elo la aiyani leka, ko ngoto koyokoyo loka yeitimba koni mbile etouma. <sup>14</sup>Akabeka layo mbo, Tikaka mbo buto ailaka ale touma tchuo lisiya. Baeki binde beokaka aleko yo.<sup>15</sup> Bakaota ta Yelusaleme. Akaota ta Tepelo la akakola osaya baungisi la basombi katikati i Tepelo; akakiola mesa e beke batokikoliaka falanga la babonga ba baungisi ba tokuku.<sup>16</sup> Akafekambo buto ailaka leka ango lomoi ta Tepelo.<sup>17</sup> Akaekisa la akabeka libo mbo, Isonomu mbo, mbele ange etotomo mbele e basomboli loka lo befindi betotina? Ndjo enu oselai amo eske lo biiba.<sup>18</sup> Bakanga bafi la Baandiki bakaoka ongpma bakalinga ndole lamba batoita ye eni kanda, bakabanga ye loka likama li baito bemwalaka loka lo inango inde. <sup>19</sup>Ekayaka likolase, bakatomowa ta boki.<sup>20</sup> Ekambaka bo batoeta la nongo,

bakaenaisandu i mosuke ikafomela kota litina linde.<sup>21</sup>Petelo akaenyela lobeko lamo, akabeka linde mbo, Laboni, tene! isandu i mosuke yeke olaniaka yosila omela.<sup>22</sup>Ye akabinoisa lioi libo mbo, Mbakai la limeli Iya Mungu!<sup>23</sup>Lotobeka lino wewe mbo, lamba oni buto atobeka la longo le mbo, foaka, kudsamaka ta baye bafi, la aiteli fiye ta botema winde, la atoimola ,bo yeke itobekei itotomowa ongoma, itokelomo loka linde.<sup>24</sup>Lotobeka lino wewe mbo bieka bitotina bitolengila lino, imilakai mbo osillai ooshai yo la itomba ino.<sup>25</sup>Etoelalenu loka losombola, yomba mbo ombei la buto amoi la lobeko, mesilakai ye loka Ise ino ono ambe ta likolo amesilenu batchuanelo bino.<sup>26</sup>Yomba mbo enu oimesili, Ise ino ono ambe ta likolo aimbomesila aleko bobo wino.<sup>27</sup>Bakakoma lisiya ta Yelusaleme. Ekambaka ye atokenda katikati i Tepelo, bakanga bafi la baandiki la bangene ba boki bakaya ambe ye.<sup>28</sup>La bakabeka linde mbo, Otokela ye mbeko la boini bokota? Ndai akafa lao bokota bokela yo?<sup>29</sup>Yesu akabeka libo mbo, Lotofelnu lobeko lomoi; binoiselekei, ndjo lotobeka lino lamba la boni bokota lotokela ye mbeko.<sup>30</sup>Lilufi liya Yoani lifoe la likolo lamba ta baito? Binoiselekei.<sup>31</sup>Bakatana fiye katikati ibo, bakabekana mbo, yomba mbo tokaobeka mbo, la likolo, atobeka mbo loka loingi oikaimilai ye?<sup>32</sup>Ndjo tobekeke mbo, la baito. Ndjo bakabanga baito loka mbo batotina baimilaka mbo Yoani ambaka bonangoli be wewe.<sup>33</sup>Ndjo bakabinoisela Yesu mbo, Toiluwi. Yesu akabeka aleko libo mbo, ei aleko loitobeisenu lamba lotokela ye la boni bokota.

## 12

<sup>1</sup>Mbisa ionga Yesu akakola obekana libo la bembila buto'amoi alobaka elanga lo vinyo,akawa likula tina lamo,akabusha likemba loka loowama touma to vinyo,la'akashwa mbele likolo loka lomoila elanga,lambisa akaokana la bamoili ba elanga lo vinyo,lale lokendo. <sup>2</sup>Mbile eobuna touma ekaengana,akatoma bokowa amoi ambe bokuki bo'elanga lo vinyo,loka loosha botuku winde bo yuma.<sup>3</sup>Bakaunda bokowa wamo,bakakuchaye la bakabinoisaye bao bule.<sup>4</sup>Akatoma lisiya ambe'bo bokowa asiya,bakakuchaye ta bochwela,la bakanyongolaye. <sup>5</sup>Akatoma ono a'asaso,bakaitaye,bakawa aleko ta bekowa besiya kongoma,bakaumabo,la bakaita basiya.<sup>6</sup>Ikatikala'ango wana inde amoi bosamomu,akatomaye ta liko ambe'bo,akabeka mbo;batolitisa wana ange. <sup>7</sup>Bakuki ba elanga lo vinyo bakabekana bo angene mbo;ono atomba ngene a bondanda,toitekeiye,la elanga lo vinyo lotomba liso.<sup>8</sup>La bakaundaye,la bakaitaye,la bakakusaye lousa lo elanga lo vinyo. <sup>9</sup>Kanikani,ngene a elanga lo vinyo atowa isai?atoya,la atoita bakuki ba elanga lamo,la atofa elanga lamo lo vinyo ta basiya.<sup>10</sup>Osilai otangai liye lioi li lisonomu;litale liye likakusomo labashwei bambele,liomba litale lilitina lifi ta ifokolo imbele. <sup>11</sup>Ta lisangi liya Ngene ndjo likamba ongoma,la imbe leka lolimwali ta baiso bino? <sup>12</sup>Batolo ba baYuda bakaluka mbo baunde Yesu,loka baluaka kembo abeke bombila wamo loka libo,ndjo bakamba labowa linginda li baito,bakaitaye,la bakaka.<sup>13</sup>Bakatoma Bafalisai la baito ba ikumbe iya Elode ambe Yesu,loka loundaye tandole eé baoui binde angene.<sup>14</sup>Bakafelaye mbo;Boekesi,toluwi mbo otobekaka kombeko iwewe,oitobangaka buto,la oitomoilaka lokuku lobuto,la otoekisa lobeko lowewe yeke Mungu atolengila la baito bakele'ongoma.Iyengani lomba yei'yengani olipa Lindjandja ambe Kaisala? <sup>15</sup>Yesu akaluwa baenyeli babe bibo,akabeka libo'mbo;loka loingi otopimeitoelekeni longbendele lomoi loka loene.<sup>16</sup>Bakatoela'e'emoi,la Yesu akaiyola'bo;bombo we la lina liye limbe liyandai?Bakamutoelaé mbo boya Kaisala.<sup>17</sup>La akabeka libo mbo;fakai iya Kaisala ambe Kaisala,la iya Mungu ambe Mungu.bakamwala likama ta limutoli linde.<sup>18</sup>Basadukai,beke bambaka batobekambo lifufukomi liyeti,bakaya tina la Yesu,la bakafelaye le lofelo; <sup>19</sup>Boekesi,tene ani Mose asonaka ekela loka liso mbo;yomba mbo butolange botolome akaongba,la aotika boataali,ndoena bana,butolange botolome atosonga botaali amo,loka abote bana loka loya butolange ono akaosila ongba.<sup>20</sup>Ikamba la basamomu bosambale,ono aboli akasonga botaali,la mbisa akangba,aitiki bana. <sup>21</sup>Ono abaele akasonga botaali wamo,la akangba aitiki aloko bana,ikamba aloko ongoma ambe ono abasaso,<sup>22</sup>Kotakani baitolange bamo bosambale bakasonge botaali wamo,batotina bakangba aleko. <sup>23</sup>Talisiyo li lifufukomu,botaali amo atomba aya ndai? loka bo bosambale basonge'ye<sup>24</sup>Yesu akabinoisela bo;oitií ta lichuanilo,loka oiluwi tosiyo lamba bofoka Mungu? <sup>25</sup>Lokambo, talifufukomu li bangbei,botolome la botaali baitosongana,batotina batomba bakitomo ta lobola.<sup>26</sup>Loka loyeke imoili lifufukomu libangbei,enu oitaka tangai koni ango mala emoi ta lokasa loya Mose,laye Mungu abekaka linde,loka lo isandu itobaana;lombe aya Abalayama,Mungu aya Yakobo,Mungu aya Isaka? <sup>27</sup>Mungu aiti Mungu a bangbei,ambe ndjo Mungu abaito be bambe la liwawi;ombei ta lichwanelo lifi.<sup>28</sup>Amoi ta basoni,ono ambaka atooka bo,akaena kembo Yesu asanoele basilikani bolo,akaya tina la Yesu,la akafelaye;loni ekela lombe lofi ta itotina? <sup>29</sup>Yesu aka'asanoela bo;tine ekela lofelofelo; okaaka,Isalaele,Ngene,Mungu iso,ambe koengene amoi,<sup>30</sup>Otosama Ngene,Mungu ao, ta botema wao bototina,ta bolimo wa bototina,ta baenyeli bao batotina,la tabofaka wao bototina. <sup>31</sup>Tene bobaele;otosama basamomu lao kee owe angane,yeiti la ekela lofi losiya loeti yeke.<sup>32</sup>Bosoni akabeka linde;imbe ongoma,Boekese,obeka ta wewe mbo Mungu ambe koamoi,la ndoena asiya keye. <sup>33</sup>La osama ye la botema bototina,ta baenyeli batotina,ta bolimo bototina,la osama butolayo ao ke owe angene,ifoeta baana batotina ba nama labafaefi batotina beke batokelomo. <sup>34</sup>Ekaenaka Yesu kembo aosanola laweli akabeka linde mbo;oiti ango esika ta bokota boya Mungu la buto ango 'amoi aika felaye felo. <sup>35</sup>Yesu akambaka atokisa ta Tepelo,atobeka mbo;enikanda basoni ba bikela batobeka mbo kilisito ambe wana aya Tawiti? <sup>36</sup>Tawiti ye angene akawalismo la bolimo,akabeka mbo;Ngene aobeka la ngene ange mbo;ngalakase ta boo wange bo bolome,lotaani lotota baiyani bao bambe sekala ibakolo'bao. <sup>37</sup>Tawiti engene atotaye Ngene,eni kanda aengani linde? La linginda likambaka litookaye ta liomali lifi.<sup>38</sup>Akabeka libo ta liekisomu linde mbo;kebakai loka lobasoni ba bikela,balangi okenda lokandjo isa'isa,balangi ofomo kalibo la lokuku ta biseke bi baito likama,Batoluka bingaelo bilokuku ta bisondjamelu,la biseke bifelo ta baomali. <sup>40</sup>Batonokila bieto ibataali be baka ongbelo batolome, la basomboli basaasa loka loenene bolo ta baiso ba baito.<sup>41</sup>Yesu akangala tina la ichunga i'lifaefi ta mbele ee Mungu,baito ba lifoka bakata likama. <sup>42</sup>Botaali bo ibube amoi,akata ango bieto biele bibingbendele,ikaengana la bieto bikikelike. <sup>43</sup>Yesu,Akata baeki

binde,akabeka libo mbo ;lotobeka lino ta wewe mbo,ono botaali a ibube aofa koeta baito batotina. <sup>44</sup> Loka basiya bafe bieto yeke baikamba layo la yeme. kani ye,la boeno winde aofa bieto binde itotina yeke ambaka layo loka losungamana linde.

## 13

<sup>1</sup>Mbile Yesu atomoaka ta Tepelo,amoi ta Baeki binde akabeka libo mbo;boekesi,enaka,batale balo,la lichomu lilo! <sup>2</sup>Yesu akabinoisela bo;otoena ye bashomu bafi?litale angolimo lietotikala likolo li lisiya lieke lietofoyomo.<sup>3</sup>Akangalase ta longo lo Bilaya,felo ii Tepelo.La Petelo,Yakobo, Yoani la Andeleya bakaiyola ye boangene lofelo lembo;<sup>4</sup>Beiseke'su,eni mbile itokomayo, la eni ndembe embo lueke'su mbo mbeko itotina yo ifoenganisomo?<sup>5</sup>Yesu akabeka libo mbo; Moilakai laweli kembo buto ango amoi ailimbiki'enu. <sup>6</sup>Lokambo likama batoya la lina liange,batobekambo;imbe ii, la batolimba likama libaito.<sup>7</sup>Ombo'okakai mboli iibitumba la iyeli ii bitumba,ndomwalai,iyengani mbo yoko itotina ikome,ndjo yeitomba koni tunga.<sup>8</sup>Yese imoi itoemaela yese isiya,la bokota bomoi botoemale bokota bosiya,itomba la lobilimo lo wenda ta biseke bitotina,itomba la semba.imbe ango koni liako libemusi.<sup>9</sup>Moilakai laweli ambe enu'angene.batokese'enu tabakita,la batoumenu fimbo ta bisandjamelo,ototomoi felo ii bekota befi,la bekota,loka lange, loka lolibekelomu. <sup>10</sup>Iyengani koni felo mbo mboli itanu ingolomo ta yese itotina.<sup>11</sup>Tambile batoka lino loka lokese'enu,oitungisamanakai loka lo yeke otobekai,bekaka yeke itokomele'enu tambile amo,loka yeitombenu ndjo otobekai bolimo botanu ndjo botobekale'enu. <sup>12</sup>Nduku atokesa nduku inde ta lingba,la Ise atokesa wana inde,la bana batoemaela baise bibo,la batoita bo. <sup>13</sup>Otoiomoi ta batotina,loka lo lina liange,ndjo ono atomba la bofilili kota liko otouwisomoi. <sup>14</sup>Mbile otoenai bowewe bo liseisemu batongala ta eseka leke loiyengani ongala,ono atotanga amoileke la weli,beke batomba ta Yudeya batoka mangu ta fongo, <sup>15</sup>Ono atomba likolo limbele aitosuluwa la aimbota loka loosa leka ta mbele inde. <sup>16</sup>La onono atomba ta lokonda aimbo binowa ale lambisa loka mbo aose tulu inde. <sup>17</sup>Ngandi la bataali batomba la baeme labeke batomwesa ta basiyi bamo! <sup>18</sup>Sombolakai mbo mbeko yamo yeikomaka tambile ee botoko. <sup>19</sup>Loka ta basiyi bamo itomba la bomusi bofi koeta bomusi bitotina, kowakola kota liako liwende kota aboni,lietakamba la kanda ebomusi wamo lakanda ebomusi wamo boimbo mbaka ale ango. <sup>20</sup>Yomba mbo,ngene aiteni ibasiyo bamo bauwe,ani buto ango amoi aimbouwa,loka lobachakolomu beke okachakola bo. <sup>21</sup>Yomba mbo buto akaobeka lino mbo ngene ambe eke,lamba ambe elo,oimilakai yo. <sup>22</sup>Loka bakilisito balolanga batomba batondoli be balonga,batowa tokesa loka lolimba bachakolomu,yomba mbo itomba ongoma. <sup>23</sup>Moilakai laweli;lobeise'enu felo imbile. <sup>24</sup>Ndjo ta basiyi bo, mbisa iyomba,lowa lotomba,bondofa boimboenisa ale angobongei winde, <sup>25</sup>Tolonge totokpase ta lobola,la befoka bo lobola boto bilima. <sup>26</sup>Totoena wana a buto atoya ta boose la bofoka. <sup>27</sup>La ototoma bakitomo,la atosela eske lomoi bachakolomu,biseke bitotina ta wenda,ta liko limoi kota liko liye'limoi. <sup>28</sup>Enakai liekisemu lieke isandu imosuke likenisa.tambile betaa bitomba la bolelamu langoto ikaotomowa,enu koluwai kembo mbile elo eomba tina. <sup>29</sup>Kolaongoma,mbile otoenai mbeko ye itotina ikaokoma,luwakai laweli mbo wana a buto ambe tina la boinda. <sup>30</sup>Lotobeka lino ta wewe,ene fecho eitoeta ango,ani yeke itotina yeitakaengana. <sup>31</sup>Lobola la nyele itoeta,ndjo baoi bange baitoeta ango. <sup>32</sup>Ta yeke imbe loka lolisiyo la mbile,buto ango amoi ailuwi,imbe bakitomo ta lobola,lamba wana,kanga ko Afa engene. <sup>33</sup>Moilakai laweli,oikpakai ilo la sembolakai,loka oiluwi eni'mbile lisiyo liamo litoya. <sup>35</sup>Ndokpai toolo,loka oiluwi eni mbile Ngene ambele atoya,lamba la likolase,lamba atiteni i'lotiyo,lamba ta lokoloko lo koko,lamba lanongo. <sup>36</sup>Laweli aiyaka oya'oshe'enu ta tolo,ta loyo linde lo futuku. <sup>37</sup>Yeke lokabeka,lobeka aleko labatotina mbo;Ndokpai tolo.

## 14

<sup>1</sup>Ta elambo lolieti lombaka labokati la baana oëna eseke la lisiö. mbisa bekumi labandiki bakaluka ndenge laweli kanda eökanda Yesu la loitöe. <sup>2</sup>Ani bakabeka mbo tinga tambile elambo, okambo liyeye liëi tomowaka aiteni ibaito.<sup>3</sup>Embaka Yesu ta betaniya tambele eya Simona, buto abaendi,botaali amoï akaota, tambile embebo tamesa.aundi tchupa ebaningo, leka loloketi likama, akabuna tchupa akauta ta botchoe bo ya Yesu. <sup>4</sup>Basiya bibo bakabeka lalisomi mbo, eseisa lobaningo imbe oka longi? <sup>5</sup>Toungisa la bakute miya isaso, ani tofe la tobube; bambaka ba tosoma oka lobotali.<sup>6</sup>Kani Yesu akabeka tikakaië. okambo eë aokeleï likuwa lilo. <sup>7</sup>Ombeï latobube mbile itotina ani enu olangi osungai bo kota eni mbile, oimbongalaï lange momongo. <sup>8</sup>Eakela leka le loengani linde lokelo, asiüwa lokomba langa felo ilingba liange. <sup>9</sup>Lobeise enu wewe, biseke bitotina elo embo bekomoko mboli itanu tawenda bototina; lobeko lokakelaë lombo beisomoko loenyelaë.<sup>10</sup>Yuda mokeliota, amoï ta liou labaele akaka ta bekumi befi, la ba andiki okamba Yesu. <sup>11</sup>Mbisa iokaë, bakaomala bakaimila olipaë bieto.ealoko akaluka ndole elo loka loambaë.<sup>12</sup>Lisio lifelo libokati we boilambomu, toena baana oka lo elambo baeki binde baka bekalinde toke endeï okakomia elambo? <sup>13</sup>Akatoma baeki baele, akabeka: kakai ta boki; oto anyamanai la botolome amoï atoli ebengu lobaye; tutaye. <sup>14</sup>Eseke lototaë, bekakai langene ambele: boekesi aöbeka mbo: eseke lombe endeï lole elambo la baeki bange?<sup>15</sup>Atonise enu liku la likolo likaosila oengana:la lokendjomo:elamo otokomanyai elambo. <sup>16</sup>Baeki bakaka, taboki, bakanya leka lototina leke abekaka libo, bakakomia elambo.<sup>17</sup>Eyaka likolose, akaya la liou la baele.<sup>18</sup>Tambile embe bo tamesa batola, Yesu akabeka: lotobeise enu wewe amoï ino ono atola lange, atoämbeï. <sup>19</sup>Bakakola okangandi, bakakola oiyoë, amoï amoï: mbo imbe endeï?<sup>20</sup>Aka mutolabo mbo: imbe amoï ta liou labaele, ono atota boö lange eseke lomoi ta topakoli. <sup>21</sup>Wana auto atoka ke ani esonomuyo linde.imbe langandi la buto ono ato amba wana auto! imbe la limengo oka lo buto ono ai botomu.<sup>22</sup>Tambile ene embakabo batola, Yesu akaosa bokati mbisa iyouchela wo,akatena, akafa bo,akabeka: osakai, moko imbe lokomba lange. <sup>23</sup>Akaosa kopo, ani

akafa ouchela amo, akafa bo, bobatolina bamwe. <sup>24</sup>E akabeka yeke imbe ngelo yange ilimeseli, efoutamase oka lobaito likama. <sup>25</sup>Lotobeka lino wewe, leitomwa ale baë lisiya kota lisio limbo komekei ta bokota bo ya Mungu. <sup>26</sup>Esilakabo lotchä boele bakaka okalila ta longo. <sup>27</sup>Yesu akabeka libo: enu yatatotina otoumai likulia, ke ani eyandikomuyo: lotouma bokuki, bekoko betomelana. <sup>28</sup>Ndjo, mbisa yange iyofufukomo, lotoka felo ino ta Galilaya. <sup>29</sup>Petelo akabeka linde mbo; yomba mbo baito batotina batotikowe, ei loimbo tikowe angu. <sup>30</sup>La Yesu akabeka lide mbo: Lotobeka lao ta wewe, owe, laboni, kole lotiyo lee, felo ii koko ota lokokoloko mala yele oto anganyei mala isaso. <sup>31</sup>Ndjo Petelo akabeka likama mbo: Loimbo anganyokowe lisiyo angu limoi, imbe ikafoengana mbo longbe lao eseke lomoi. La batotina akabeka lioi ko' limoi. <sup>32</sup>Mbisa ionga bakaka ta eseke lomoi lotomu mbo: Getesemana, la Yesu akabeka la baeki binde mbo: Ngalakai se eke, ta mbile lotosembola. <sup>33</sup>La mbisa akaosa Petelo, Yakobo, la Yoani. Aka'akola o'oka bowa la ngandi ta botema winde. <sup>34</sup>Akabeka libo mbo: Bolimo wange bo'owala la ngandi kota lingba; tikalakai eke la moilelakai. <sup>35</sup>Ekaaka ye iniyo ii esika libo, akatuliama se, la akasembola mbo: Ikafoengana foelekei bomusi we. <sup>36</sup>Akabeka mbo: Aba, ise ange, mbeko itotina iyengani lao, foyelekei kobo ee bomusi ene ambei! Ndjo oikelaka kee ani ei losami, kelaka ndjo ani elangi'owe. <sup>37</sup>Mbisa ii onga akaya lisiya ambe baeki binde basaso, akaosha bo bambe ta to'olo, la akabeka la Petelo mbo: Simona, otokpa ilo! Oimoileli ta saaango emoi! <sup>38</sup>Oikpakai toolo la sembolakai, loka mbo oiyumanaka la nyele ta likotomu; bolimo bolangi okela, ndjo bindo bimbe la bolelamu. <sup>39</sup>Akasiamba libo, la alasembola kani esembolaka ye felo. <sup>40</sup>Lisiya akaya, akanya bo ko ta toolo ani baiso bibo bambe la ilo fafo; la baitiluwa angu mbo batobinoisela ye bonoko isai. <sup>41</sup>Akaya mala eyasaso ambe bo, akabeka libo mbo, okombe kota toolo? Oto feumai? Ifoengana, mbile eoya! Batoana Wana a buto ta bao ba baito ba bobo. <sup>42</sup>Emalakai, tokei; moilakai, ono atoanei aoya. <sup>43</sup>Kota mbile ekambaka ye atobeka, Yuda akaya, ye la Ba liou la baele, la likama li baito binde. Bambaka la bepanga la tokpondo la batomoaka la bakanga bafi la baandiki la bangene ba boki. <sup>44</sup>Boani aosila obeisa bo ndembe, obeka mbo, ono lotoloma ye likeka, ye oko. Undakai ye la kakai linde la weli. <sup>45</sup>Akaya, akaka ambe Yesu, akabeka mbo, Labi! Akaloma ye. <sup>46</sup>Bakata bao likolo linde, bakaunda ye. <sup>47</sup>Ndjo amoi ta beke ambaka libo, akaluta ambote inde, akakpeta bokowa bo kanga efi, akatena litoi linde. <sup>48</sup>Yesu akabeka libo mbo, enu oyai la kembe la tokpondo oyaunde kee wiba? <sup>49</sup>Basiyo batotina lokambaka lino ta Tepelo loka loekisa oikaundekei. Boolo ani ekaengana tosiyo. <sup>50</sup>Batolina bakatika ye la bakaka mangu. <sup>51</sup>Wainenge amoi botoloe akatuta ye, aufami la kikwembe ta bindo binde. Bakaunda ye, <sup>52</sup>ndjo ye akaka mangu lofona akatika kikwembe. <sup>53</sup>Bakakesa ye ambe kanga efi, bakanga bafi basiya la batolo ba boki la baandiki bakaoamana. <sup>54</sup>Petelo akatuta ye esika kota eseke loya kanga efi; akangala eseke lomoi la bapolisi atokala imbe. <sup>55</sup>Bekowa befi be kanga, la baito batotina babeimo, bakalinga libekelomu loka loya Yesu mbo baite ye, ndjo baikaisa. <sup>56</sup>Baito likama bakambaka vatobeka mbeko ii lolanga loka linde, ta baoi bibo baikamba bato'okana. <sup>57</sup>Basiya bakaemala obeka lolanga ta lobeko linde mbo, <sup>58</sup>Tooke ye atobeka mbo, ei lotobuna Tepelo ene ekakelomo la bao la mbisa i basiyu basaso lotoshwa esiya ene eitoshomo la bao. <sup>59</sup>Imbe ongoma, babekeli bibo baikangana. <sup>60</sup>Kanga efi akaemala katikati ibo la akaiyola Yesu mbo, Oitobeka ii? Babeki ba baito be loka lokpesowe bambe isai? <sup>61</sup>Ndjo akangala hai, aikabeka. Kanga efi akaiyola ye mbo, Owe ombe Kilisito wana a liutcholomu? <sup>62</sup>Yesu akabeka mbo, lombe ye, otoenai Wana abuto angalise ta boo bolome bofoka la oya ta bafita la likolo. <sup>63</sup>Kanga efi akaha tulu inde, la akabeka mbo, Totomba kola yeme i babekeli basiya loka loingi? <sup>64</sup>Ofokai baoi ba limoli. Baenyeli bino bambe isai? Batotina bakaimiala mbo, ye aondu la lingba. <sup>65</sup>Bamoi bakatchwela ye soi, bakaufa bombo winde la bakauma ye, obeka mbo, Nangolaka! la Bapolisi baumaye lobaka. <sup>66</sup>Embaka Petelo ta lopango, wana botaali, amoiu ta bekowa beya kanga efi, akaya. <sup>67</sup>Ekaenaka ye Petelo atokala imbe, akamoila ye, la akabeka linde mbo, owe aleko ombaka eseke lomoi la Monasaleta ono, ye Yesu. <sup>68</sup>Ndjo akanganya la kabeka mbo, loiluwi, loitoluwa angu litina li baoi bao. La akatomowa ta bonoko bo lopango. <sup>69</sup>Wanabotaali amo akaena ye lisiya, kakola obeka la baito be baemalaka onga mbo, Ono ambe amoi ibo. <sup>70</sup>Ndjo akanganya lisiya. Mbisa iniyo baito be baemalaka onga bakabeka la Petelo mbo, wewe ombe amoi ibo, ombe Mogalilai. <sup>71</sup>Akaaka la tokesi, akalapa mbo lokaobeka lolanga Mungu aitekei! Akalapa mbo loiluwi buto oko otobekai loka linde. <sup>72</sup>Kota mbile amo koko ekata lokokoloko mala ee baele. La Petelo akaenyelisa baoi beke Yesu abekelaka ye mbo: Felo mbo koko ete lokokoloko mala yele, otoanganyei mala isaso la otobeka mbololuwi ye. Ekaenyelaka ye, akalela ta baiso.

## 15

<sup>1</sup>La nongo nongo, bekota befi be kanga la bekumi la basoni ba bikela, bakawa litoamani la ikumbe. Mbisa iyokanda Yesu, bakaaka linde, la bakakesa ye ambe Pilato. <sup>2</sup>Pilato akafela ye: Ombe Bokota bo Bayuda? Yesu akabinoisela ye mbo: O'osila obeka. <sup>3</sup>Bekota befi be kanga bakasitaka ye la mbeko likama. <sup>4</sup>Pilato akaiyola ye lisiya mbo, oiti la limutoli liobekai? okaka mbeko likata bakata likolo liyao. <sup>5</sup>Ndjo Yesu aimutoli angu la Pilato akamwala. <sup>6</sup>Ta lisiyo litotina li liomali, bambaka batotomoisela bokodomu bomoi ta bonyololo, ono linginda batolengila ye. <sup>7</sup>Imbaka ta bonyololo amoi lina linde mbo Balaba la baito linde, baitaka buto. <sup>8</sup>Linginda, bakalila okalengila amoi loka bafe libo otutana la asili ibo. <sup>9</sup>Pilato akabinoisela bo mbo: Olangi mbo lofoyele'nu Bokota bo Bayuda? <sup>10</sup>Loka aluwaka mbo bekota befi be kanga banaka ye angu loka lo liiya. <sup>11</sup>Ndjo bekota be kanga ifi bakabeka la linginda mbo batomoisendjo Balaba. <sup>12</sup>Pilato, akabeka libo mbo: Olangii mbo lokele isai ta ono akatomo mbo Bokotabo Bayuda? <sup>13</sup>Bakamama lisiya likamambo: Itakai ye! <sup>14</sup>Pilato akabeka libo: Boni bobo bokawa ye? Bakamama likama fafo mbo: Itakai ye! <sup>15</sup>Pilato, akaomalisa linginda, akatomoisela Balaba; la mbisa iyokutcha Yesu, akatomoisela ye loka mbo aitomo. <sup>16</sup>Basola bakaaka la Yesu aiteni ii likula, ilangi obeka mbo ta mbele ee bokota, bakata linginda litotina li basola. <sup>17</sup>Bakabatisa ye kandjo enenu la bakata ta botchwe winde komo emoi ebekeke, ene bawaka. <sup>18</sup>Bakaakola ofa ye kalibo mbo: Kalibo, Bokota bo Bayuda! <sup>19</sup>Bakauma ye ta botchwe la isandu, bakachwela ye soi, la bakasuluwela yela baluwwi se, la bakafa ye ilitisa. <sup>20</sup>Mbisa iyosetcha ye, bakafoya ye kandjo enenu,

bakabatisa ye tulu inde, la bakatola ye loka baite ye ta lieka. <sup>21</sup>Bakitolisa la bofoka Simona buto a Kulene, ise aya Alesandala la Lufusu lieka liya Yesu; <sup>22</sup>bakaaka la Yesu ta eseke lo touwa to baito. <sup>23</sup>Bakafa ye vinyo ene basobiaka yo eseke lomoi la bote, la aikaosa yo. <sup>24</sup>Mbisa bakakakemisa ye ta lieka, baka'anana tulu inde, la ani batouma djeke loka lo'oluwa lamba buto la buto atoosha yanga. <sup>25</sup>Ta mbile bakakakemisaka ye ta lieka, imbaka mbile ee libwa ee nongo. <sup>26</sup>Bakasona lokasa loka lolisambisomu likolo li bochwé winde mbo: "Bokota bo Bayuda". <sup>27</sup>Bakakakemisa linde biba biele, amoi ta boo winde bolome la onomoi ta boo bo bwali. <sup>28</sup>Imbe loka loenganisa baoi ba tosiyo baya Mungu mbo: Baota ye ta eseke lo baito babe. <sup>29</sup>Baeti la ndole bakambaka bato bilimisa bochwé la batomola ye. Batobeka linde mbo: Maoh! Owe ono obekaka mbo otobuna tepelo, la otosha mbisa ii basiyo basaso, <sup>30</sup>uwisa oweange, suluwaka ta lieka! <sup>31</sup>Bekota befi be kanga la basoni ba bikela bambaka aleko batosetcha Yesu, la batobekana bo angene mbo: Ye akauwisakabaito basiya, loka loingi aitouwisa ye angene! <sup>32</sup>Iyengani la Masiya, Bokota bo Isalaele asuluwe kanikani ta lieka, tokafena ongoma, totoimila ye! Beke bakakemisomoko linde ta lieka bakamola aleko ye. <sup>33</sup>La ta mbile ee ifitika, lilima likaya likaufa wenda bototina kota mbile eya'saso. <sup>34</sup>Ta mbile eya'saso, Yesu akamama la limiki li likama: "Eloi, Eloi, lamasabakatani?" Ilangi obeka mbo: Mungu ange, Mungu ange, loka loingi o'otikei? <sup>35</sup>Basiya beke bambaka onga, bakaoka atomama, bakabeka mbo: Enak, atota Eliya. <sup>36</sup>Amoi ibo akaaka mangu akaosa linuka, akaotisa lio aiteni ii koba, akakanda lio ta isandu ikikelike, akaila lio likolo loka lomwesa Yesu akabeka: Tikaka, toene koni lamba Eliya atoya oyafoya ye ta lieka. <sup>37</sup>Ndjo Yesu akamama likama, la mbisa akangba. <sup>38</sup>Tulu ene embaka aiteni ii mbele Mungu wkafaama ko sekala tee ko likolo. <sup>39</sup>Bokota amoi a basola, ono ambaka atoemala felo iya Yesu, aenaka ani engbaka Yesu, la akabeka mbo: Omongo buto ambe Wana aya Mungu. <sup>40</sup>Imbaka aleko la bataali batomoila la esika, munga ibo imbaka Maliya a Magadala, Maliya inango aya Yakobo ono wainenge, la Yose. <sup>41</sup>Bo bambaka batotuta ye la bakuwelaka ye ta mbile embakaye ta Galilaya, la bataali basiya likamaba lilaka linde ta Yelusaleme. <sup>42</sup>Likolase likaya, kee ani embaka lisiyo li likomi, ilangi obeka mbo felo ii lisiyo lilopemo; <sup>43</sup>Yosefe buto a boki bo Alimataya, akaya, buto a boimo bo lichwani li Bayuda, ono ambaka atoumbakela bokota boya Mungu. Akaaka engene ambe Pilato akalengila boliyo boya Yesu. <sup>44</sup>Ndjo Pilato akamwala o'oka mbo Yesu aongba ko kani-kani. Akabe mbo bate bokota bo basola, bafele ye lamba akangbaka koala. <sup>45</sup>Mbisa iyo'oka bokota bo basilikani, Pilato akaesa ishoshwa ambe Yosefe loka aose boliyo boya Yesu. <sup>46</sup>Yosefe akasomba tulu efufu fafo, akasuluwisa boliyo ta lieka, akalingila ye la tulu amo efufu, akata ye ta mbila yeke iwufomoko la litale. <sup>47</sup>Maliya a Magadala, la Maliya inango aya Yose, bambaka batomoila eseke bakata boliyo wamo.

## 16

<sup>1</sup>Mbisa ii lisiyo li Yenga oeta, Maliya a Magadala, Maliya inango aya Yakobo, la Saloma bakasomba bakasomba baina ba baningo ba loketi likama loka louwa ta mbila iya Yesu. <sup>2</sup>Lisiyo li felo li Yenga la nongonongo, bakaaka ta mbila, mbile etomoaka lowa. <sup>3</sup>Bakabekana bo angene mbo: Ndai atofoelesu litale esika ta bo'otelo bo mbila? <sup>4</sup>La, ekailaka bo baiso likolo, bakaena ango litale, lieke limbaka bofi, lieke lilikolamanaka. <sup>5</sup>Bakaota elo ta mbila, bakaena wana botolome amoi angalise ta boo bolome, abati kandjo efufu, la bakamba la bowa. <sup>6</sup>Akabeka libo mbo: Oimbakai la bowa; otolukai Yesu a Nasaleta, ono aitomoko; aosila loyayowo, aiti ale eke; tene eseke leke bataka ye ine ole. <sup>7</sup>Ndjo kakai okabeka la baeki binde la Petelo bakee felo ino ta Galilaya: Elo ndjo otoenai ye, ani abekeleke'nu. <sup>8</sup>Bakatomowa ta mbila la bakaaka mangu. Bowa la baenya-enya ikaunda bo; la baikabekela buto ango amoi, loka lo bowa wibo. <sup>9</sup>Ta mbile eyayowaka Yesu ta nongo ee lisiyo li Yenga li felo, akaene koni la Maliya a Magadala, ono belimo bebe bosambale betomoaka ambe ye. <sup>10</sup>Akaaka la mboli la beke bambaka linde, beke bambaka la ngandi la bileli. <sup>11</sup>Ta mbile eokaka bo mbo akombe la liwawi, la kembo aene ye, baikaimila yeango. <sup>12</sup>Mbisa iyonga, akaenamana ta bofono bosiya, la baele bibo ani embaka bo talokendo ta ndole loka lo'okata boki. <sup>13</sup>Bakabinowa oyanangola ta bee amoi, baikaimilaaleko ango bo. <sup>14</sup>Lisiya, akaenamana la ba liou la baele, ta mbile embaka bo ta mesa ani batola; la akabekela bo lokaa lo botema bofoka wibo la boeno wibo bo liimeli, loka mbo baikaimila beke baenaka ye ani eyayowaka ye. <sup>15</sup>La akabeka libo mbo: Kakai ta wenda bototina, la nangolakai mboli itanu ambe baito batotina. <sup>16</sup>Ono atoimila la ekolufiomo atouwisomo, ndjo ono atoimila atokpesomo se. <sup>17</sup>Tene tokesa tombotuka beke batoimila: Batosaya belimo bebe la lina liange; batobeka la benoko be kani-kani; <sup>18</sup>batounda felo la bao; batomwa bieka bibe bi lingba; la bietowabo leka ango lomoi; batotela bao ta baito ba bemusi la baito ba biale batouwisomo. <sup>19</sup>Mbisa iya Ngene obeka libo, akalila ta lobola, la akangalase ta boo bolome boya Mungu. <sup>20</sup>La bakakesena okanangola biseke bitotina. Ngene akauwa libo, la akaenganisaliyo linde ta ndole ee tokesa tombaka tototuta bo.